

Le texte proposé ici a été établi à partir de l'édition parue en 1673, à Paris, chez Sébastien Mabre-Cramoisy.

HORTORUM LIBER PRIMUS. FLORES.

H_1 v.1 Quae terrae cultura magis florentibus hortis
 2 conveniat, quae par nemori sit forma serendo,
 3 ducendae quis aquae, quis fructibus usus habendis
 4 praecipio. Caelum ventis aperite serenis,
 5 o superi, quorum floret de munere tellus.
 6 Vatibus ignotam nam me novus incitat ardor
 7 ire viam magno quae primum ostensa Maroni
 8 extremo cum vela trahens sub fine laborum
 9 Italiae pingues hortos quae cura colendi
 10 ornaret, canere agricolis populoque parabat.
 11 Fas mihi divini tantum vestigia vatis
 12 posse sequi ; summoque volans dum tendit Olympo
 13 sublimem aspicere et longe observare tuendo.
 14 Tu mihi, tu gentis lux o suprema togatae,
 15 praeside quo Francae florebunt denique leges,
 16 Lamonide, legum si quid tutela tuarum
 17 magnarumque sinant, portas quae pondera, rerum
 18 huc ades atque tuos fer non jam invitus honores.
 19 Dumque regis Themidem Themidisque palatia magnae
 20 summa tenes et regna fori impacata gubernas,
 21 exemploque tuo mores luxumque coerces
 22 Musarum tenues etiam ne despice lusus.
 23 Fors erit ut quamquam levia et minus ampla secutum
 24 nominis aequa tui si vatem afflaverit aura
 25 te possim canere, atque tubas aequate canendo.
 26 Tum tibi grande meo veniet de carmine nomen
 27 atque mei flectent se per tua tempora flores.
 28 Principio tellus horto quaerenda parando est
 29 Eoim ad solem et caelo subjecta salubri,
 30 cui non vicino collis de rure propinquus
 31 immineat fumosque palus obducatur inertes.
 32 Nam caelo imprimis flores laetantur aperto

33 nec possint tardos stagnorum ferre vapores.
34 Ante pares autem ruri quam cuncta serendo
35 quaere quod ingenium, quae sit natura colendae
36 telluris ; tellus melior cui plurima subter
37 uligo, pingui gaudent uligine flores.
38 Illa ferax herbarum, illam experieris arando,
39 et cultus omnis patientem et floribus aptam.
40 Hanc fuge quae pictis latebras dedit ima lacertis
41 argilla in sterili, vel quam natus adurit
42 tophus et infelix cretosi glarea ruris,
43 et lapidosa soli ne te male gleba rubentis
44 occupet, atque tuum teneat frustrata bidentem.
45 Ne pigeat scrobibus fundum explorare sub altis,
46 quosdam saepe soli facies externa fefellit,
47 intus enim vitium viridis sub gramine glebae
48 aut tophus scaber aut urens argilla latebat.
49 Postquam autem parte ex omni constare videbis
50 et caelum et terram, nam terra obnoxia caelo est.
51 Ipse mihi validam quatiens per tesqua bipennem
52 limitem agat latum et longe nemus omne repellat
53 villicus, omne nemus nocet omnis floribus umbra.
54 Tum rastro validisque bidentibus undique tellus
55 versanda et vastum fractis aequanda per aequor
56 aggeribus glebarum hortoque paranda futuro.
57 Ne tamen aequatum properes describere campum
58 areolis buxumque solo plantare recenti.
59 Differ opus, totos autumnus perferat imbres
60 campus iners dum terra situ durata residat.
61 Et postquam fundo penitus persederit imo
62 actaque transierint glebis hiberna subactis,
63 vere novo terram rursus versabis et omnem
64 aequabis rastris et adunco vomere campum
65 quem deinde in varias buxo describe figuras.
66 Olim tempus erat cum res hortensis ab arte
67 munditiam nullam, nulla ornamenta petebat.
68 Saepe rosam passim permixtam agrestibus herbis
69 vidisses, nec erant per humum segmenta viarum
70 digesta in sese et buxo distincta virenti.
71 Prima autem cultum pro se quaesivit et artem
72 Flora corymbiferi celebrat dum numina Bacchi.
73 Festa dies aderat vicini numina ruris
74 convenere ibat pando Silenus asello
75 cum satyris, dabat ipse deus sua vina vocatis.
76 Adfuit et Cybele Phrygias celebrata per urbes
77 ipsaque cum reliquis Flora invitata deabus
78 venit inornatis, ut erat neglecta, capillis
79 sive fuit fastus seu fors fiducia formae.
80 Non illi pubes ridendi prompta pepercit
81 neglectam risere. Deam Berecynthia mater
82 semotam a turba casum miserata puellae
83 exornat certa comam sub lege reponit
84 floribus et buxo mixtis (nam buxifer omnis
85 undique campus erat) velavit tempora nymphae.
86 Reddidit is speciem cultus coepitque videri
87 formosa, et meruit, novus hinc decor additus ori.
88 Ex illo ut Floram decuit cultura per artem

89 floribus ille decor posthac quaesitus et hortis,
90 quem tamen Ausonii cultores quamque Pelasgi
91 nescivere suos nulla qui lege per hortos
92 plantabant flores nec eas componere norant
93 areolis tonsaque vias discernere buxo.
94 Culta super reliquas Francis topiaria gentes
95 ingenium seu mite soli caelique benigni
96 temperies tantam per sese adjuverit artem
97 sive illam egregiae solers industria gentis
98 extuderit seris seu venerit usus ab annis.
99 Tuque adeo si quando hortum villamque parabis
100 quaere duces operi eximios artisque magistrum
101 qui tibi membranae puro super aequore formam
102 exemplumque operis plumbo describat et omnem
103 cum duce et ipse tuo tecum meditare figuram
104 explorans ne quid forsan tellure sub ipsa
105 posthac ars pravum vel inemendabile peccet.
106 Nam magis in summa si quid deforme figura
107 et patet et melius longe sibi subvenit error.
108 Sunt qui mille modis pertexunt mille figuras
109 in buxo quales Creta confusus in alta
110 exhibuit labyrinthus et irremeabilis error.
111 Sunt alii Phrygium quos ars imitata laborem
112 plus juvet intonsae ceu cum per stamina lanae
113 ducit barbaricos virgo Sidonia textus
114 et tendunt oras circum quas floribus explent.
115 Multi simplicibus rata per discrimina quadris
116 delectantur ubi se flores undique prompti
117 objiciant spectantum oculis manibusque legentum.
118 Non variam hortorum diversa exempla per artem
119 proponam unde tibi e multis optanda requiras.
120 Illa mihi reliquas placeat super optima formas
121 ipsi quae campo textu meliore quadrabit.
122 Postquam cuncta tibi fuerint provisa, subactum
123 area ferro iterum late explananda per aequor
124 ne si planities dorso decedat iniquo
125 deformet textumque horti buxique figuram.
126 Mox ubi dura suo de frigore bruma remittet
127 cuncta tibi stratum buxo plebs rustica campum
128 conserat et quamquam causando multa moretur
129 festina dum sole licet caeloque sereno.
130 Res quibus angustum concesserit artior hortum
131 pro buxo didicere suos includere flores
132 aut humilis lignis saepto testaeve rubentis,
133 exiguam florum buxus ne lubrica sedem
134 anticipet campumque suis radicibus urat.
135 Ne tamen hoc buxi pro crimine villicus omni
136 horto buxum adimat, sine buxo grandibus hortis
137 non constabit honos umquam suus ipsaque semper
138 quantumvis culti languebit gratia ruris.
139 At quoniam florum penitus natura genusque
140 et varium est et multa modis sunt semina miris,
141 illorum proprios generatim discere cultus
142 profuerit tum quo praesertim sidere crescant.
143 Quae quibus est habilis tellus, quae commoda plantis.
144 Nam neque quam variae species et semina florum

145 est numerus nec quae quibus est vis insita bulbis.
146 Quorum pars brumae impatiens et condita terrae
147 ver tepidum exspectat donec se tollat in auras,
148 pars hiemem passura sua ab radice virescit
149 per brumam rigidos Boreae aspernata furores,
150 pars amat apricum solem, pars frigus et umbram.
151 Nec tellus omnis vires dabit omnibus aequas.
152 Namque hos siccus ager flores juvat, humidus illos,
153 quae cultu infelix et cautibus horret acutis.
154 Utilis est aliis aliis incommoda tellus,
155 omnia solerti quae sunt discenda colono.
156 Dumque seris flores iterumque iterumque monebo.
157 Menstrua ut evolvas signantes tempora fastos
158 caelestique legas suprema volumina mundi
159 et memor observes quo denique signifer orbis
160 astrorum varios discriminet ordine menses,
161 quas auras paret Eurus, aquis quid turbidus Auster
162 cogitet et quid Sol serus, quid portet Eous,
163 quos ventos cornu, quo Cynthia provocet imbres,
164 quae caelo quam certa fides sit habenda sereno,
165 quatenus aut Helice aut plaustro tardante Bootes
166 sint aequi arboribus, teneris quid floribus obsint
167 vel nimbosae Hyades vel Pleiades Atlanteae.
168 Nam neglecta aliis et inobservata per annum
169 sidera saepe nocent, superi posuere sub illis
170 culturae rationem omnem vitaeque labores.
171 Ne te autem varii fallant discrimina caeli
172 ante juvat ventos praesciscere, nam nisi noris
173 ventorum morem varium et mutabile caelum
174 felicem frustra alterius miraberis hortum.
175 Et quamquam caeli veniat clementior aura
176 cum vere et Zephyris tamen ipsis fidere ventis
177 desine, namque fidem produnt hoc tempore venti.
178 Et licet ipse Aries veris praesagia portet
179 aurato insignis villo Zephyrosque reducat,
180 nescio quid tandem interdum fatale minatur
181 floribus et duro per caelum sidere saevit.
182 Tempore non alio nubes gravioribus Auster
183 rumpit aquis segetesque ipsas populatur et hortos.
184 Floribus ipsa etiam vis est metuenda relictis
185 frigoris et prorsus restent ne frigora, caelo
186 respice discedens vestigia certa reliquit
187 tristis hiems, haec signa memor servare memento
188 et quae seminibus sint aequa et iniqua serendis
189 sidera, sideribus certis nam semina certa
190 sunt mandanda solo. Tu commoda tempora disce.
191 Ipsa suas postquam implevit topiaria partes,
192 ne molli subeant campo et dominantur in hortis
193 herbae infelices, hortorum margine in ipso
194 inter et areolas gracili perfundit arena
195 terram omnem purgatque locum de more colonus.
196 Et nisi perpetuis campum insectabere rastris
197 ipsa etiam herba frequens sparsam superabit arenam
198 malvaeque tribulique et inxsuperabile gramen.
199 Nec te difficilis quamvis haec cura retardet.
200 Namque suo veniet merces non sera labori,

201 vix hiberna novo concesserit aura tepori
 202 terra sinus laxabit et undique germine rupto
 203 multa per areolas sese tibi copia florum
 204 fundet opesque tui attonitus miraberis horti.
 205 Sed flores prior ante alios candore nivali
 206 fronde super larga tollit se primula veris
 207 interdumque sinus aperit diversa rubentes
 208 et quae non uno folium fucata colore
 209 Graeca peregrinis venit cyclaminus ab oris.
 210 Altera nam niveos, rubros ostentat amictus
 211 altera, florentes vernis in mensibus ambae.
 212 Corcyrae geminam montes peperere frequentem
 213 et crebrum saxis coritum et nemorosa Zacynthus
 214 mensibus aestivis floret quoque plurima et ipsum
 215 deinde sub autumnum multo se flore propagat.
 216 Ipsa etiam primo mollis fumaria vere
 217 ostendet varios per Norica saxa colores.
 218 At non horrendos caeli perferre tonantis
 219 ut perhibent poterit laeso non flore fragores,
 220 cum vel fulmineo fumaria tacta vapore
 221 deficiat lapsaque jacens cervice recumbat.
 222 Tunc et caelesti quae dicitur iris ab arcu
 223 splendibit flores variata coloribus illis
 224 quos pluvia accipiunt adverso nubila sole.
 225 Iridis at species varias variosque colores
 226 distinguet variis pro tempestatibus annus.
 227 Tuque chelidonium cum nuntia veris hirundo
 228 stagna super volitavit avis de nomine dictum
 229 ad primos veris Zephyros florere parabis.
 230 Nec mora flamenti pallebit multus in auro
 231 Narcissus, miser ah ! Quondam puer ille sub undis
 232 dum se contemplatur amat sed perdit amantem
 233 forma novumque facit pueri de corpore florem.
 234 Nec Viola ipsa suos longum celabit odores
 235 quae ferrugineo dum sese obnubit amictu
 236 frondibus in mediis humili de caespite surgit
 237 ipsa humilis simplexque et simplice perlita fuco.
 238 Et si sunt veri vates nec vana locuti
 239 Nympha fuit quae jam flos est comes una Dianae
 240 sed comites inter longe pulcherrima Ianthis.
 241 Hanc olim vaccas quando pavisse Pheraeas
 242 dicitur errantem vidit cum Phoebus amavit,
 243 nec vulnus celavit amans, perterrita virgo
 244 proripuit sese in silvas monuitque Dianam.
 245 Ille soror colles inquit fuge, namque supremos
 246 Phoebus amat colles et caelo gaudet aperto.
 247 Ibat per valles virgo fontesque petebat
 248 umbriferos saepesque inter deserta latebat ;
 249 iste pudoris amor blandique modestia vultus
 250 addidit et formae pretium meruitque videri
 251 dum latuit. Jam furta deus fraudesque parabat.
 252 Cum dea : "Formosae si non licet esse pudicam
 253 Ah ! Pereat potius quae non fert forma pudorem."
 254 Dixit et obscura infecit ferrugine vultum.
 255 Jam deformis erat fuerat quae pulchra Dianae
 256 nec sic displicuit, florem nam diva puellam

257 esse dedit tanto pro virginitatis amore
 258 cui suus est et honos et primum servat odorem.
 259 Flos autem nasci valles solet ire per imas
 260 sponte sua terrae pretiosum munus agrestis
 261 nec violae nocet esse humilem neque sentibus ortam
 262 in mediis is honos, ea odoris gratia flori est.
 263 Vere suos etiam cessent modo frigora promit
 264 quos Hyacinthus habet Phoebi de crimine flores.
 265 Namque sub Eurotam dum Phoebus torquet in auras
 266 imprudens discum pueri per tempora venit
 267 obliquus pariter de vulnere palluit isto
 268 et deus et juvenis fuso de sanguine surgit
 269 flos novus et primos Phoebi testatur amores.
 270 At species non est hyacinthis una nec uno
 271 vere, sed aestivo passim quoque tempore florent.
 272 Nec simplex flori color est in simplice forma.
 273 Ipsa etiam tollunt humili se colchica thyrsos
 274 quorum vagina flores rumpuntur ab arta
 275 diversi et varios fundunt per rura colores.
 276 Sed cum terra sinu primum mollita tepenti
 277 est patiens operum florum quos ipse propinqua
 278 destinat aestati mandat diversa paratis.
 279 Semina pulvillis cultor mandataque curet
 280 anthemidem, cyanum, lychnim, delphinia, caltham
 281 et linum et malvas et odoriferam melilotum.
 282 Nam praecomposita semen tellure receptum
 283 si sitis urat humum riguo vel fonte juvabit
 284 interdum terram vel cultu urgebit inertem.
 285 Immensum est autem flores numerare serendos
 286 vere novo ; cunctis primordia floribus udum
 287 ver dabit, et tenera spes anni ostendet in herba.
 288 Jamque per areolas pictum caput arduus effert
 289 supra alios longe flores qui fronte superba
 290 duxit ab imperio nomen ; plebs undique florum
 291 agmine circumstat denso seu forte salutet
 292 regem humilis capitisque altum veneretur honorem.
 293 Illi surgit apex summo de vertice virgae
 294 aureus hunc apicem crista viridante coronat
 295 ingens luxuries foliorum et vertice ab alto
 296 quattuor ex uno promittit caudice flores
 297 inversos in humum, et folio pendente recurvos.
 298 Nec florum numero ex omni formosior esset,
 299 nec qui per campos regnaret dignior alter,
 300 si formae insigni dotem junxisset odoris.
 301 Ne vernos autem nimium properate per imbres
 302 tulipae ; vobis imber frigusque noceret.
 303 Vester honos veniet cum bruma remiserit, et cum
 304 post brumam puri soles, et laeta serena
 305 contigerint, nulloque graves a frigore Lunae.
 306 Tum florum late ingentem admirabere sylvam
 307 omnibus areolis. Omnem nam multa per hortum
 308 in tenues foliis se versicoloribus auras
 309 proferet atque suum ostendet tulipa decorem
 310 cui formae pretium varii fecere colores.
 311 Nam seu permixtum niveo candore ruborem
 312 confundat foliis sive illam sparsa cruentet

313 purpura, seu ritu viduarum, veste sub atra
314 palleat, aut varium foliis imitetur achatem
315 obtinuit primos formae excellentis honores.
316 Dalmatiae et quondam qui flos jam regnat in hortis
317 virgo suis fontis cui caerulea Nympha Timavi
318 mater erat, Proteusque pater, sic omnia rerum
319 de patris ingenio Nympham diversa decebant.
320 Orbe pererrato fines Vertumnus obibat
321 Illyrios, Nymphae matris pro fonte sedenti
322 dicere blanditias et amantia verba parabat.
323 Sed virgo longe fugit aversata parantem.
324 Et variorum ut erat per se studiosa colorum,
325 Vertumnus formas sese vertebat in omnes
326 pro vario Nymphae ingenio si forte placeret.
327 Verum ubi vota Deus se perdere sensit et artes
328 perdere blanditias, audax jam factus amando
329 se pariterque Deum pariter confessus amantem est
330 vimque adeo addebat verbis. "Servare pudorem,
331 dii patrii", exclamat virgo ; coepitque videri
332 digna suis votis, factus de virgine flos est.
333 Quod fulsit nitidis aurum crinale capillis
334 et quae taeniolae capiti vittaeque fuerunt
335 mutantur foliis, largo de pectore thyrsus
336 fit gracilis qui se tollit sublimis ab alta
337 luxurie foliorum ipso de vertice thyrsi
338 flos calycem caelo versum componit in orbem
339 oblongum senaque calix se fronde coronat
340 omnes pandit ubi quot habet natura colores.
341 Nam virgo quamvis formam mutata colorum
342 quos habuit primos etiam servavit amores.
343 Floribus his autem vitio telluris ab ipso
344 major forma venit, quod enim mirabile dictu
345 affecto ex habitu et fundo infelice sequuntur
346 confusi melius majori errore colores.
347 Et si forte velis his floribus addere formam
348 languens quaere solum, languor dabit ipse colorem
349 tulipis, tellus ne sit male fertilis illis
350 omnes de fundo nimium felice ruberent.
351 Exin dives ubi pulvillis omnibus hortus
352 floruerit madidis si fors Notus imbrifer alis
353 ingruat aut sicca Boreas effusus ab Arcto
354 ferte aris herbas, gaudent florentibus herbis
355 arae omnes quondam perhibent placasse Tonantem
356 muneribus Glyceram subitos dum cogeret imbres,
357 templorum ornabat textis altaria sertis
358 quando olim lectis e gramine floribus aras
359 simplice munditia et cultus non prodiga magni
360 infima plebs voti nondum ambitiosa colebat.
361 Imbribus et quondam nimiis memini ipse malignum
362 humorem vidisse anni multumque madenti
363 aprillem perflatum austro quo perditus omnis
364 veris honos et spes anni populata recentis.
365 Tunc olim, ut fama est, vallis per rura Sabinae
366 mos erat ambusto celebrare Palilia feno.
367 Tum madidus vino divinae pastor agebat
368 festa Pali ne grando satis pecorique noceret,

369 urebat paleas et Februa sacra parabat.
370 Cum caelesti Aries splendet stellifer auro
371 pratorum quondam nymphae, nunc florea nymphis
372 ornamenta, tuo florebunt Bellides horto
373 quas inter major silvestris caule praealto
374 hortensis nam flore minor sed larga parentem
375 nobilitat late soboles quae surgit ab uno
376 caudice picta sinus fili de more trilicis.
377 Tum niveos Iris quam mittit Etruria flores
378 at Lusitano quae venit litore profert
379 luteolos forma haec spectabilis illa colore.
380 Et qui per montes sese Narcissus Iberos
381 sublimi attollit junco folioque comanti
382 quaeque per irriguas quaerenda sisymbria valles
383 crescunt nectendis cum myrto nata coronis
384 flosque Jovis varius folii tricoloris et ipsi
385 par violae nulloque tamen spectatus odore
386 crescit et Idaliae Veneri ploratus Adonis.
387 Tu quoque mulcendis blando qui carmine nymphis
388 litore clarus eras quondam ranuncule, Mauro
389 per virides campos, te versicolore paratu
390 ostendas tacitoque animum pallore fateris.
391 Nam puer arcano mentem labefactus amore
392 quos dederat nymphis cantando acceperat ignes.
393 Omnibus est illis facilis cultura neque ullam
394 expectant rastrum curam incurvique ligonis
395 cum semel emissis tulerint radicibus auras.
396 Floribus his fossam nil debet cura coloni
397 praeter humum tenuemque suo pro tempore lympha,
398 munere pro tanto non est ea gratia tanti.
399 Nec vos pallenti flavescentes lumine calthae
400 transierim Siculo quas herbifer Acis in agro
401 nascentes curvo primus sub litore vidit.
402 Calthaque solis amans solem dum spectat amantum,
403 duxit eum quem fert ipso de sole colorem.
404 Parte alia toto viridis sub margine buxi
405 crispaeque comam summoque cacumine findi
406 paulatim incipiunt folio variata rubenti
407 leucoia, inclemens ne vos, ah ! laeserit aura
408 pro flore egregio et merito pro floris odore,
409 et quod non poterit brumam durare nec imbres
410 hibernos tristesque minas Aquilonis iniqui
411 leucoii genus omne cavis imponere testis
412 cura sit ut rauco si turbidus imbre November
413 ingruerit testae impositum transferre sub imam
414 possis deinde domum atque cavis servare sub altis.
415 Est quoque Sambucus patriis quam mittit ab oris
416 Geldria flore rosas candenti imitata tumentes,
417 hanc etiam regnare tuo laetabere campo.
418 Ut bene floreret primis in mensibus annus
419 ad Maias festum instituit florale Kalendas
420 Postumius, molli tunc primum operatus in herba
421 villicus implicitis philyra frondente capillis
422 sacra indicebat festo Floralia pago.
423 Agricolae plexis ornabant tempora sertis
424 et matrem florum Maio florente piabant

425 primitiis hortorum. At postquam Athamantidos Helles
 426 cedere vectorem caelo spectabis ab alto
 427 jam flores hortis alios variare videbis.
 428 Maternumque bono si mensem aspexerit astro
 429 magnus Atlantiades nec campos imbribus atris
 430 obruat Oleniae sidus pluviale capellae
 431 ipsa tibi solito jam laetior omnibus herbis
 432 luxuriabit humus dumis redolentibus ipsae
 433 florebunt saepes et rara fronde myricae,
 434 florebit tum molle cicer viridesque genistae
 435 et Pelusiaco colocasia nota Canopo,
 436 nodisque spinisque frequentibus asper acanthus
 437 partheniique nitens folium rorisque marini
 438 isthmiacumque apium vicinaque salvia rutae
 439 et viridem jam sera comam juncosa triorchis
 440 et matronales violae Alpinumque thalictrum
 441 vosque per Allobrogas carpenda phalangia valles
 442 et thymus et rhamni necnon et nardus agrestis,
 443 sedumque isopyrumque antirrhinumque bonoque
 444 carminibus moly Arcadicum flos dictus Homero.
 445 Omnia quae cultu positum per semen eodem
 446 proveniunt flores pulvillis omnibus illos
 447 conserere et campum late his vestire juvabit,
 448 ne prorsus pars ulla tuum sit nuda per hortum,
 449 tantum disce suo bene ponere tempore semen
 450 et justa campo immissum memor occule terra.
 451 Paeonis at silva per se sublimis ab alta
 452 florem pandit ovans saturo perfusa rubore,
 453 At non ille tamen non est rubor ille pudoris
 454 crimen habet taetro quod flos declarat odore.
 455 Felix nympa deum si non habuisset amantem
 456 nam patrio quondam cum fors in litore regi
 457 Paeonis Alcinoo candentes pasceret agnos,
 458 cavitt mortales virgo superosque cavere
 459 non potuit, factus caelesti crimine flos est.
 460 Et tu rumpis humum et multo te flore profundis
 461 qui riguas inter crescis, convolvule, valles
 462 dulce rudimentum meditantis lilia quondam
 463 naturae cum sese opera ad majora parabat.
 464 Mox quoque sponte sua cyani et delphinia totos
 465 incipient textu vario frondere per agros,
 466 et pictos blande emittens blattaria flores
 467 nec non diverso virosa aconita colore
 468 feniculumque acinumque lupique volubile gramen
 469 qui varii formis variique coloribus omnes
 470 ostendent varium per buxea texta decorem.
 471 His et mille aliis sine nomine floribus hortus
 472 dives erit lateque suos jactabit odores.
 473 Omnia tum caelo rident hilarata sereno,
 474 annus agit Zephyros quos molli gramine tellus
 475 excipit et cantu exsultans philomela salutat
 476 lascivique greges persultant pabula laeta
 477 laetifico mentes percussi vere novellas.
 478 Non illo quisquam non tempore durus in urbem
 479 ire velit jubeatque meo discedere rure :
 480 gaudia ruris amem liberrimus. O ! ubi qui me

481 alma Turo riguos delatum sistat ad amnes
482 carum inter Ligerimque suis qui maxima Franci
483 litoribus late ostendunt miracula ruris.
484 Salve, o magna parens hortorum, patria tellus,
485 cui non Bantini saltus nec molle Ferentum,
486 non Surrentini colles vallesque Sabinae,
487 non ager Oebalius regnataque rura Phalanto,
488 non sese aequiparent felices Tiburis umbrae,
489 adde omnem laetam rivis et fontibus oram,
490 pratorum immensos tractus et amoena secundum
491 flumina vitiferosque utroque ex litore colles.
492 Quid memorem variis opulentam mercibus urbem
493 et studia et mores populi quem serica texta
494 tractantem fecit caeli clementia blandum ?
495 Adde umbras nemorum aeternas et mollia semper
496 gramine prata novo et numquam sine floribus hortos.
497 Talis ager liquidis quem Sequana perfluit undis,
498 tales Medocini colles vicinaque rura
499 Sanclovii necnon Richelidis arva Ruellae
500 et Sangermani montes habitata supremis
501 numinibus sedes et Mommorantia vallis,
502 nec mihi quos olim regina Semiramis hortos
503 grandi mole super tectis suspendit ab altis,
504 nec vos Hesperidum viridaria culta sororum
505 pomaque flammifero quondam vigilata draconi
506 aut vana Elysios jactarit Graecia campos,
507 tanta Parisiaci postquam miracula ruris
508 et luxu dites hortos aedesque superbas,
509 et nemora et fontes fictosque canalibus amnes
510 exhibet ipsa suis dives Lutetia campis.
511 Tu caelo quando mensis Junonius ibit,
512 villice, tolle manus, Tauri de fronte minantur
513 imbrem Hyades dubio pendent dum nubila caelo
514 si precibus places superos nimbosque repellas
515 ipsa alios humus atque alios uberrima flores
516 proferet et pictis lucebunt omnia campis.
517 Aspicies tollentem alte fastigia lychnim
518 quemque olim Ascraeus celebravit carmine vates
519 asphodelum vesca sese radice ferentem,
520 qua veteres usi quondam perhibentur agrestes
521 et Byzantini dictum de nomine regis
522 majorem cyanum ; mox et clypeata per omnes
523 horti pulvillos nasturtia mixta frequenti
524 spectabis cytiso juvenum pulcherrima quondam
525 corpora, nunc flores, venator Dardanus ille
526 hic erat Argolica pastor de gente profectus.
527 Nec te coniferas foliis imitata cupressos
528 tardabit longum posthac linaria tempus
529 dicta Italis bello de nomine bella videri.
530 Ipsaque cui violae subluceat purpura nigrae
531 anthemidi permixta suos aquilegia flores
532 per virides hortos, Tauro lucente, parabit.
533 Miscebitque suos tum demum utrique colores
534 flos Helenae illius totum quae tanta per orbem
535 tam magno Europae atque Asiae repetenda tumultu
536 tot conjuratis incendia moverat armis.

537 Dein germana sinu sese digitalis aperto
538 ostendit campis cui discolor aura refulget,
539 et tu non uno insignis calamintha decore
540 anthoraque Aethiopsisque rubroque colore thryallis
541 scillaque diversum triplici quae flore per annum
542 lentisco similis tria tempora monstrat arandi
543 floriferumque lytrum Tyrioque superbus in ostro
544 consolidae regalis honos obscuraque in hortis
545 cerinthe vulgusque aliorum ignobile florum.
546 Sed Zephyri melior favet aura, rosaria florent,
547 ipsa rubent spineta novos meditata colores.
548 Purpuream jam dumus agit de germine glandem
549 floris odoriferi ; plebei cedite flores,
550 hortorum regina suos ostendit honores
551 prae qua Puniceis ardens aurora quadrigis
552 palleat atque suos confundat Delia vultus.
553 Sed quae se hesterno nondum rosa credere soli
554 audebat, nexus omnes atque omnia rumpit
555 vincla, premi impatiens et germine turget aperto.
556 Posses de forma reginam deque pudore
557 virgineo posses sentire fuisse pudicam.
558 Nam pariter regina fuit pariterque pudica.
559 Rumor Amazonia natam de gente ferebat
560 non verus. Nam Graeca fuit bimarique Corintho
561 jura dabat, Graias vulgarat fama per urbes
562 insignem meritis. Jamque omnis Achaia nympham
563 optabat nymphaeque alto de sanguine reges.
564 Et prior ante omnes ibat bellator Halesus
565 Isiadesque Brias qui se septempace Nilo
566 jactabat natum, venit ipse bipennifer Arcas
567 deponitque suas lauros bellicae tropaea,
568 Thebanis tulerat victor quae plurima campis
569 reginae ante pedes et spes affectat easdem.
570 Illa superba autem (faciebat forma superbam)
571 "Non has, inquit, eram vobis quaerenda per artes,
572 debellanda fui, non exoranda" ; nec illos
573 sustinet audire instantes populumque patresque
574 ducebat secum armatos temploque subibat,
575 (templum erat et sanctum Soli Solisque sorori).
576 Turba omnis sequitur gradientem, venit ad aram
577 virgo deam implorans pro virginitate tuenda.
578 Ecce autem incensi furiis et Halesus et Arcas
579 Isiadesque Brias cum magna parte suorum
580 accurrunt rumpuntque fores ; fit pugna, resistit
581 omni cum populo mediisque in millibus ardet
582 exultans armis regina procosque repellit.
583 At seu majores audacia mixta pudori
584 addiderit flammis oculis, seu forma sub armis
585 creverit, omnis erat quae circumfusa Rhodanthen,
586 plebs ardentem oculis et mira luce coruscantem
587 obstupuit magnoque simul clamore ; Rhodanthe
588 sit dea, tollantur magnae simulacra Dianae,
589 reginam imponunt aris tolluntque Dianam.
590 Fraternalis animos injuria facta sorori
591 permovit laesoque furens pro numine Phoebus
592 ultores radios obliquo lumine torsit,

593 lumine quo coepit primum taedere Rhodanthen
594 esse deam. Nam pes per sese altaribus ipsis
595 figitur et ductis saxo radicibus haeret.
596 Jam virides tollit ramos dum brachia tendit.
597 Languet egens animi sed adhuc regina suamque
598 dum mutat formam vel sic mutasse decebat.
599 Nam pulcher flos est fuerat quae pulchra Rhodanthe.
600 Felix, divinos si numquam visa fuisset
601 digna pati cultus nec sic meruisset amari.
602 At populus laesa pro majestate Dianae
603 spinarum horrentem in cumulum conversus acutis
604 reginam telis etiam est defendere promptus.
605 Fitque Brias volvox, Arcas fit fucus, Halesus
606 papilio, servant primos qui floris amores
607 certatimque rosam crebro affectare volatu
608 non cessant totisque fragrantem ambire diebus.
609 Sed florum e numero forma spectatior omni
610 est aevi brevioris : habent sic optima casus
611 quaeque suos nec fata ferunt res longa beatas.
612 Quot vero species et quam diversa rosarum
613 nomina sint justo non fas includere versu.
614 Centum aliae foliis aliae se mille coronant
615 undantique sinu et crispa cervice comantes
616 effundunt spinae crebra sub cuspide flammis,
617 simplice sunt aliae folio. Quid deinde Damasco
618 aut Nomadum e silvis aut ex Jerichunte profectas
619 commemorem vel quos fert Lusitania cistos ?
620 Ipsa etiam cultu e certo portabit inermes
621 terra rosas spinis quae non sine laude carebunt.
622 His tamen esse nocet nudas, patet obvia furto
623 forma omnis cultu ni sit defensa severo.
624 Glauca tuos et agros etiam salinca decebit,
625 quamquam puniceis non aequiparanda rosetis.
626 Sed non difficilis fuerit jactura rosarum,
627 quae tunc praetereunt cum caelo lucet Orion.
628 Is modo florebit quem gens a tubere dicit
629 Celtica, fictilibus candens hyacinthus in urnis.
630 Namque peregrinum nobis cisque aequora vectum
631 extremis nuper Francus mercator ab Indis
632 attulerat, culto Calaber quem nobilis horto
633 exceptum Romae primum gentique Latinae,
634 mox toti deinde Europae transmisit habendum.
635 Formae excellenti flos candidus addit odorem
636 eximium niveaeque ostentans frontis honores
637 erigitur, lateque omni dominantur in horto.
638 Quod si divini te quando gratia floris
639 ceperit, hunc reliquis horti prae floribus unum
640 sedulus in primis selecto vase repone
641 praecipuum tristes caeli ne perferat auras.
642 Et ne illum laedant venti neve atterat imber
643 improbus et caelo male Sirius urat ab alto,
644 abde domo florem tenerum et violenta timentem,
645 non quaeri indignum trans aequora transque remotos
646 Indorum fines et nostris floribus addi.
647 Nec tibi mox etiam deerunt quae flore recurvo
648 cymbala puniceum jactant virgata colorem,

649 qui flos ni costis retro tendentibus iret
650 liliū erat, aliū quando non fundit odorem.
651 Ipsum etiam filis auro radiantibus ardens
652 lucebit saturo chrysantes murice pictum.
653 Et quamquam virides male pingat amaracus hortos,
654 ne tamen illius curam aspernere, benigni
655 nam si praedulcem vim naribus afflet odoris,
656 fors erit ut studeas etiam componere testis
657 emeritum blandae noris cum praemia plantae,
658 quam Venus ipsa sibi eximiam Simoenta sub altum
659 plantavit plantamque suo donavit odore.
660 Mox et achilleam foliis se mille ferentem
661 quosque per aestatem longe diversa colores
662 iris habet, toto laetus miraberis horto
663 et linum et malvas et semper flore decoram
664 luteolo melilotum et quae radice tenaci
665 luctantes plaustro tauros cunctatur Ononis
666 molle rubens tardis sed formidata bubulcis.
667 Si se tum virides nympharum turba per hortos
668 effundat manibus flores decerpere plenis
669 ne dubitet textisque imponereserta quasillis
670 unde sibi plexam componat quaeque coronam
671 et caput atque sinus lectis e floribus ornet.
672 At triste exemplum paveant fugiantque puellae
673 regina immeritos quo quondam Aegyptia flores
674 funeris horrendi tristes temeravit in usus,
675 Actiaco postquam sub litore fusus et amens
676 foede terga dedit positus Antonius armis.
677 Illa autem ne se victori invita superbo
678 traderet aut matres spectaret serva Latinas
679 praemissos furto mediis in floribus angues
680 admovit lateri nudo floresque sub ipsos
681 rapto expiravit mulier furiosa marito.
682 Sunt alii florum atque alii quos exsequar usus,
683 floribus ut variis magnum cratera coronant
684 ingentique abaco super atque tapetibus altis
685 sublimem imponunt aut inter splendida magnae
686 ornamenta aulae qui late spargat odorem.
687 Festa suis alii templorum altaria sertis
688 intendunt textu vario perque omnia fundunt,
689 aut inter cenas procerum accubitusque superbos,
690 necnon et vulgus famulantem et turba ministra
691 floribus ex horto lectis et suavibus herbis
692 exornant lances quas mensae imponat herili.
693 Nec desunt flores prunarum ardente favilla
694 qui coquere et lentos soleant torrere per ignes
695 vas intra oblongum vel clausi concava vitri,
696 fumidus it sursum vapor et frigentis aheni
697 haesit ubi lateri incluso algoremque recepit,
698 paulatim rorem fluidus densatur in udum
699 excurritque vagis patefacta per ora fluentis,
700 et stillantem in aquam florum se spiritus omnis
701 exprimit atque novas recipit de funere vires.
702 Floribus ipsa etiam e tritis ars ducit odores
703 nec non vibrandis per luxum unguenta capillis
704 et quas vendebat Capuae seplasia merces

705 cujus deliciis et molli pulvere fractus
706 Annibal, exitium quando infelicis Elisae
707 ulturus bello Romae suprema parabat.
708 Quid narrem ut florum exemplo atque coloribus ipsis
709 incoepit pictura suos miscere colores.
710 Sic quondam factus Glycerae de munere pictor
711 Pausiades, cum per discrimina mille colorum
712 pingebat flores quos ad se nympa ferebat.
713 Inde suos etiam Serum de stamine textus
714 illusit variis textentum cura figuris.
715 Mel quoque, divini munus caeleste liquoris,
716 vestrum opus est volucres qui mellis dona daturas
717 pascitis, expressi vestro de nectare, flores.
718 Forsitan et florum morbis qui tristibus usus
719 quaeque potestates herbis quae dona medendi
720 a superis concessa olim mortalibus aegris
721 cantarem, ni me spatiis urgeret iniquis
722 copia dicendi et cursum properare moneret.
723 Namque Parisiaca qua Sequana praefluit urbi
724 rure suburbano vitae vir caelibis horti
725 cultor erat, carpens privatae gaudia vitae.
726 Et quamvis illi non essent praedia longis
727 conspicienda jugis pictaeque tapetibus aedes,
728 regum fortunas magnorum paupere fundo
729 aequabat servans inopi non multa senectae.
730 Nam saepe et flores longinquo ex orbe petitos
731 et quas praesentes morbis cognoverat herbas
732 montibus afferri externis mandabat et horto
733 plantari ; tum multa super felicibus herbis
734 monstratosque usus caris narrabat amicis.
735 Languentum interea vicinis undique pagis
736 cernere vulgus erat concursu accedere magno
737 et miseris omnes solamen quaerere rebus.
738 Ibant atra quibus pectus torrebat anhelum
739 febris et immiti carpebat viscera flamma
740 et quibus illuvies membris immunda fluebat ;
741 ibant ipsi etiam quibus acer anhelitus artus
742 quassabat diros agitans sub corde tremores
743 et quos nullae artes poterant sanare medentum :
744 floribus ille suis morbos tollebat et herbis.
745 Omnes namque domum laeti vegetique redibant,
746 vatibus ipse aliis quae commemoranda relinquo.
747 Ferventes etiam tum Granadilla per aestus
748 prodit, Amazonii quam litore fluminis ortam
749 ad nos extremo Peruvia misit ab orbe.
750 Flos alte incisas crispato margine frondes
751 caule in sublimi vallo praetendit acuto
752 spinarum in morem, patiens, o Christe, tuorum
753 inscriptus foliis summa instrumenta dolorum.
754 Nam surgens flore e medio capita alta tricuspis
755 sursum tollit apex clavos imitatus aduncos.
756 Ipsa sinus etiam meleagris picta comantes
757 atque echium atque rumex atque hesperis atque adiantum
758 aestivo varios ducent a sole colores.
759 Proferet inde suas ardent dum brachia cancri
760 cariophyllus opes picto qui flore per agros

761 egregiae dona ostendit pulcherrima formae.
762 Est odor eximius flori, vagina tumentem
763 colligit ima comam foliorum, incisa profunde
764 sunt folia et blande curvum crispantur in orbem.
765 Difficilis flos ille tamen nec promptus alendo est
766 qui terrae immodicamve sitim caelive calores
767 injustos tristesve auras frigusve malignum
768 non impune feret prima dum pubet in herba.
769 Et nisi sustineat plantam curare recentem
770 villicus, ac fontes sitiendi aspergine crebra
771 vespere seu sero primo seu mane ministret :
772 illi rite suum non conciliabit honorem.
773 At tu quae flores in tergum aversa reflectis
774 obliquos ostro costas virgata rubenti,
775 sin spatium unius possis durare diei,
776 hemerocallis eris, vos illam optate frequentem
777 inserta, o nymphae, sed quae si gloria floris,
778 si quis tangit honos, vos illam optate recentem.
779 Tum si forte tuis orobanche floreat hortis,
780 ne prope vicino de gramine ruminet herbam
781 bucula, sed plantae fatali parcere discat.
782 Nam vaccae, admorso tantisper flore, feruntur
783 errantes, taurumque petunt armentaque totis
784 hinc furere interdum videas exterrita silvis,
785 perque gregem indomitos ardere libidinis aestus.
786 Ardua candentes jam matricaria gemmas
787 cuspidibus tollit longis, stipata frequente
788 thlaspi. Cres nympham puer olim Thlaspis amabat.
789 Fortunati ambo si mutua gaudia vobis
790 venissent per non infelices hymenaeos.
791 Interea gelidos per fontes uda chamaedrys
792 gaudet, dentatis cervice simillima sertis,
793 gaudent et foliis bicoloribus orchides ambae,
794 culturae indociles. Nec jam reor abfore, quin mox
795 aspicias hortum candenti albescere silva ;
796 nam nisi sera aestas cunctabitur, ordine longo
797 laeta super virides tollent se lilia virgas.
798 Ante alias autem florem hunc sibi Gallia gentes
799 praecipuum optavit. Phrygiis seu missus ab oris
800 per Francum Hectoriden, fatis cum plenus avitis
801 externasque ardens trans aequora quaerere lauros
802 appulit his primum terris sedesque locavit,
803 sive, quod antiquos perhibent memorare parentes
804 lilia summo olim ceu lapsa ancilia caelo,
805 primus qui Franca Christum de gente professus
806 accepit manibus puris Clodovaeus, et ipsos
807 mandavit donum hoc divum servare nepotes,
808 pro gentis scuto insigni et fatalibus armis.
809 Quae magni fatis Lodoici, pace sub alta,
810 florebut, totum postquam terroribus orbem
811 implevit bellique omnem armorumque tumultum
812 atque injustitiam et fraudes et saeva duella
813 componens, cunctis indixit foedera terris.
814 Ecce autem virides ardenti sole per hortos
815 pallet, et antiquos Phoebi suspirat amores
816 infelix Clytie, reliquos super ardua flores.

817 Nam junco sese tollit sublimis in alto
818 ad solem si forte suo spectetur amanti.
819 Nec deerunt Clytiae comites, aestiva secundum
820 solstitia, ipse crocus cara cum smilace, virgo
821 haec, puer ille, suos promittunt germine flores.
822 Postquam crispatos imitata papavera cirros
823 floruerint, tum terra alios induta paratus
824 diversos in non diverso flore colores
825 ostentabit, opum monimentum insigne suarum
826 munus Eleusinae matris, Cereale papaver,
827 cui sublime caput folium sandyce rubenti
828 Puniceum, sed quae species est alba, crepanti
829 concolor argento gaza resplendet agresti.
830 Sanandos etiam ad morbos exempta resectis
831 grana papaveribus, medicos adhibentur in usus
832 aegro, nocte sopor seu conciliandus iniqua,
833 sive suus tussi modus imponendus anhelae.
834 Non male tum Graiis florens eryngus in hortis
835 quaeritur, hunc gremio portet si nupta virentem
836 numquam inconcessos conjux moditabitur ignes.
837 Illo flore Phaon meruit Sapphonis amores,
838 credita si quondam sit adhuc credenda vetustas.
839 At dum ferventi per agros canis aestifer astro
840 perfurit et nulli descendunt nubibus imbres,
841 cum gelidos noctis rores sol dissipat, et cum
842 jam serae veniunt altis de montibus umbrae,
843 ne pigeat largos hortis inducere fontes
844 unde animam reddas herbis, ni stirpibus imis
845 omnino aruerint crebraque aspergine campum
846 perlue, dum possis penitus reparare caducas
847 languentum florum vitali flumine vires.
848 Non illos udis veniens Aurora capillis
849 jam reficit nec seros humifer applicat herbis.
850 Sed reliquos inter flores quos serior aestas
851 proferet, insignes magis et majore superbos
852 ornatu videas immortales amarantos.
853 Nam florum late varium sine nomine vulgus
854 per reliquam deinde aestatem serosque calores
855 luxuriare tuo passim spectabis in horto,
856 horminum hedsyarumque rubens humilemque conysam
857 angelicamque apiumque, securidacamque minorem
858 clematidem, armeriam, isatidem calthasque palustres,
859 berberin et gracili coriandra trementia filo,
860 et geminum abrotonum, myrrhim tenuemque Melissam
861 buphthalmumque siumque et olentia Centaurea.
862 Non aberunt vario pingunt quae rura colore
863 stoechas, hyosciamus, menthae, cichorea, nigellae
864 et varios referens maculosa calendula vultus.
865 Sicque suos aestas alio dabit ordine flores
866 autumnusque suos, sic, per sua tempora, florum
867 munere perpetuo redimitus habebitur annus.
868 Regnat et in pratis flos aureus, Atticus aster
869 dictus Grajugenis, Latii cui nomen amello
870 fecere agricolae, riguis in vallibus illum
871 pastores fontesque ipsos et curva secundum
872 flumina decerpunt nectendis torquibus aptum,

873 cum matura suo pendet vindemia soli.
874 Est etiam extremo qui nuper venit ab orbe
875 narcissus, folium lucenti concolor ostro
876 auratisque litus maculis ceu sparserit imber
877 aureus egregium texto de murice florem,
878 qui possit Tyrios foliis hebetare tapetas.
879 Vosque boni, vos illum hortis inducite crebrum
880 cultores, rurique novum decus addite Franco.
881 Et quamquam ad cultum non sat respondeat omnem
882 flos amat ille coli, vestrae ne parcite curae :
883 omnes vincet opes vestri si floreat horti.
884 Ipsa per areolas buxus tondenda sub ipsum
885 septembrem primive tepent cum tempora veris,
886 si prius effusum paulo mollitus ad imbrem
887 ramus erit, nimium ferro ne forte resistat.
888 Cuncti autem nec sorte una nec legibus iisdem
889 nascuntur flores, positis pars altera granis,
890 altera tuberibus, pars provenit altera bulbis.
891 Mense sub Octobri bulbos tellure refossa
892 longa super tabulata sereni ad luminis auras
893 ordine proponunt longo, dum protinus omnem
894 collectum aestate humorem tellure sub ipsa
895 ad solem exuerint, purgatos tempore certo,
896 committuntque solo rursus scrobibusque sub altis
897 infodiunt, rigidae durent ut frigora brumae.
898 At non tuberibus similis debetur habendis
899 cura, semel quae missa solo se sponte profundunt
900 summam subter humum, tamen altius infode bulbos
901 tuberibus, majoris egent humoris, et ipsum
902 ni fundo subeant metuunt penetrabile frigus.
903 Quod si non ipsos inter constare colonos
904 comperias, flores qua tempestate serendi
905 observabis ubi cedenti Scorpius ibit
906 obvius Erigonae chelasque movebit inertes,
907 cum gruis auditur raucae de nubibus altis,
908 non est ulla magis plantandis floribus apta
909 tempestas, terram si paucis ante diebus
910 humifer autumnus modico tepefecerit imbre
911 ipsa sinu tellus bulbos complexa tepenti
912 laetificum humorem germen diffundit in imum.
913 Effusos ne terra tamen restagnet ad imbres
914 unde soli fundo bulbos corrumpat aquosi,
915 aggesto clivum in modicum paullumque tumentis
916 pendentique solo flores plantare juvabit.
917 Excidat ut prona tellure superfluum humor.
918 Sic famulos flores nuper plantare monebat
919 Nostrius Augustis custos qui praesidet hortis,
920 ornandi ruris magnus monstrator et omnis
921 egregius culturae hortorum artisque magister.
922 Contemplator item felix quae Luna serendo est ;
923 namque illam caeli tempestatumque potentem
924 et tellus colit omnis et alte observat euntem,
925 dum caelo fulget radiis argentea puris,
926 illius et faciles veniunt de munere venti
927 atque suos ponunt aerae tolluntque furores.
928 Post quartam donec plenum se curvet in orbem

929 optima floribus est satio cum deficit omnis
930 infausta est operi nec terrae est apta movendae.
931 Nec caelo agricolae invito date semina terris,
932 quando Luna vetat Lunae parete vetanti,
933 cumque favent stellae, stellas audite faventes.
934 Vos et araturo monstrabitur astra colono
935 Parrhasides stellae solae vigilare soletis
936 omnibus e stellis, solae et monstrare potestis.
937 Sunt qui saepe suos medicato semine flores
938 folliculo majore sinus laxare tumentes
939 et calycem angustum foliorum implere comanti
940 luxuria, et contra morem turgere docebunt.
941 Sunt etiam certa qui floribus arte colores
942 conciliare alios aliosque inducere odores,
943 et propriam norunt formae emendare figuram
944 aut differre suos in non sua tempora fetus,
945 aut illos partu properato urgere morantes.
946 Quae tibi deliciae faciles sumptuque parandae
947 non magno, nec enim praestent qui talia deerunt.
948 Sed quae floruerant extremos solis ad aestus
949 dum gravis ardentis urebat Sirius agros
950 hibernos etiam durant tanacetaper imbres,
951 clara colore suo crispaeque volumine frondis.
952 Hunc primus Poeno quondam de litore florem
953 dum premeret victor dura obsidione Tunetum,
954 Carolus Austriades terrae transmisit Iberae.
955 Dumque riget brumale gelu primaque December
956 urit humum glacie Scythici sub frigore caeli
957 Sarmaticosque viret nigranti flore per agros
958 helleborum summasque nitent aconita per Alpes
959 lutea, namque alium florent diversa per annum.
960 Inde pharetrata cyclaminos Perside missas
961 curvaque laureolam Mosae per litora natam
962 atque Crocum viridis super alta cacumina Jurae
963 crescentem largumque coma folioque merascum
964 et toto passim vernantes frigore sonchos,
965 nec non mensibus his narcissum sera comantem
966 florere aspicias et brumales hyacinthos.
967 Sed contra tristes ventos hiememque nivisam
968 laesurumque gelu flores defendite vestros
969 congestis stipulis et multi stramine feni,
970 cultores, donec redeat clementia veris.
971 Nam varii per agros hiberno tempore casus
972 immeritos varia exercent discrimina flores.
973 At quis te, quis divum autem, tam numine duro,
974 hortorum decus et formosi gloria ruris,
975 perque nives medias et acerbi incommoda caeli
976 exposuit teneram rigidis anemona procellis ?
977 Tempore digna alio et caeli melioribus auris.
978 Namque colorato cum primum murice blandum
979 exseris os lucique comam diffundis apricae
980 et picturatos non uno errore colorum
981 ostendis diversa sinus flammisque comantes
982 spectantum meritos in te convertis amores,
983 et nullus florum numero tibi certet ab omni
984 aut sic crispari aut totidem ostentare colores,

985 ipsaque quam radio per vellera texta sonanti
986 Sidoniae ducunt matres tibi purpura cedat.
987 Hanc Flora ut perhibent stimulis agitata malignis
988 invidiae caelo immeritam damnavit iniquo.
989 Illa, ut erat Graias inter celeberrima nymphas,
990 forma excellebat, sed obest quoque forma puellis,
991 obfuit huic certe. Nam dum fortasse per agros
992 libertatis amans frigus captaret et auras
993 impleretque sinum ventis, non aemula nympham
994 Flora tulit Zephyro conjux studioque mariti
995 exarsit, divae numen mox sensit acerbae
996 infelix anemona suos quae clara per agros,
997 servasset formam si non formosa fuisset.
998 Quaeque fuit patrias inter pulcherrima nymphas
999 nunc flores inter flos est pulcherrimus omnes.
1000 Et Venerem fert fama suum dum plorat Adonin
1001 fulmineis torvi perfossum dentibus apri
1002 illo praecipuum solatam flore dolorem.
1003 Nam postquam fuso, quod erat mortale, cruori
1004 eripuit sacroque aspersit denique succo,
1005 haud mora purpureo natus de sanguine flos est
1006 purpureus, Veneri ereptum qui penset Adonim.
1007 Ut flori non est unus decor aut color unus,
1008 vidi gramineo qui plenum caespite discum
1009 illius vario perfundant semine floris.
1010 Mox ubi se primum profert, vis multa colorum
1011 illudit spectantum oculis et amabilis error.
1012 In Lucemburgis sic Gasto Aurelius hortis
1013 hujus floris amans illum plantare solebat,
1014 florentemque domus intra penetralia discum
1015 mandabat coram afferri mensamque sub ipsam,
1016 seque suamque aulam aspectu oblectabat amoeno.
1017 Sic te prae reliquis anemonem floribus unam
1018 in primis colere hiberno sub sole monebo
1019 omnibus egregios flores ut crebra profundat
1020 pulvillis et parte hortum plus occupet aequa
1021 una suo cladem hortorum rurisque ruinam
1022 atque hiemis vultum horrentem solabitur ostro.
1023 Arvaeque dum foliis squallent inhonora caducis
1024 et sterilem pluviis contristat Aquarius annum
1025 squallentes crispo recreabit murice campos,
1026 illa tamen sese meliori proferet ortu
1027 lenis ubi placidi spiraverit aura Favoni,
1028 namque et amat Zephyros anemone et amatur ab illis.
1029 Floribus at variis omnis dum pingitur annus
1030 ne semper pictos hortorum respice flores,
1031 respice ad auctorem florum caelumque salutans
1032 aethere cum lucet puro de nocte serena
1033 contemplare suos ut habet quot sidera flores.

HORTORUM LIBER SECUNDUS. NEMUS.

H_2 v.1 Me nemora atque omnis nemorum pulcherrimus ordo
 2 et spatia umbrandum late fundenda per hortum
 3 invitant ; hortis nam si florentibus umbra
 4 abfuerit, reliquo sua deerit gratia ruri.
 5 Vos grandes luci et silvae aspirate canenti !
 6 Is mihi contingat vestro de munere ramus,
 7 velant unde sacri quando sua tempora vates,
 8 ipse et amem meritam capiti imposuisse coronam.
 9 Jam se cantanti frondosa cacumina quercus
 10 inclinant plauduntque comis nemora alta coruscis.
 11 Ipsa mihi laeto fremitu assensuque secundo
 12 e totis plausum responsat Gallia silvis.
 13 Nec me deinde suo teneat clamore Cithaeron
 14 Maenalaque Arcadiis toties lustrata deabus,
 15 non Dodonaei saltus silvaeque Molorchi,
 16 aut nigris late ilicibus perplexa Calydne
 17 non vallis nemorosa cupressifera Cyllenes.
 18 Una meos cantus tellus jam Franca moretur
 19 quae tot nobilibus passim laetissima silvis
 20 conspicienda sui late miracula ruris
 21 ostendit, lucique solum commendat amoenis.
 22 Quisquis es, in patrio villam qui condere fundo
 23 forte paras ; hac parte tuas metaberis aedes,
 24 unde tibi liber pateat prospectus in hortum
 25 exstantem vitroque domus bipatente fenestrae
 26 ordinibus longis Eoi lumina solis
 27 accipiant. At qua veniunt de parte procellae
 28 horriferae unde Aquilo brumam molitur et imbres
 29 plantabis silvam. Ni contra providus obstes
 30 omnia quippe ruat Boreae intractabilis ira,
 31 ille etiam rupesque altas montesque supremos
 32 silvifragis agitat flabris et murmure rauco
 33 aestuat, illisis per colles robora ramis
 34 quassa gemunt, plangunt valles et magnus Olympus.
 35 Tuque adeo silvam rapidis opponere ventis
 36 sis memor, ut frangant ventorum verbera rami.
 37 Talis et ipsa mari qua Neustria parte Britanno
 38 procurrit, silvis late defenditur altis
 39 Oceani contra ventos Boreaeque furores ;
 40 hic pagi ingentes, ingentia praedia magnis
 41 divisa arboribus toto sub litore prostant.
 42 Nunc age, quae nemoris ratio, quae forma parandi
 43 expediam. Quamvis ipsa de stirpe parentis
 44 pullulet et tenues tollat se quercus in auras
 45 aut mutata solo ramis exsultet opacis ;
 46 forma tamen nemoris non sit mihi gratior ulla
 47 quam quod per campos posito de semine crevit.
 48 Et quamquam sit agro praelongum tempus inertis
 49 durandum ac tardae surgant de semine quercus,
 50 his tamen, his longe veniunt felicius umbrae ;
 51 nam certum est de glande satas radicibus imis

52 altius in terram per se descendere plantas
53 majoresque adeo in caelum profundere ramos,
54 seu quod dediscant mutatam semina matrem
55 degeneremque ferant alieno ex ubere prolem,
56 sive quod ipsa sibi cognatae inolescere terrae
57 glans primo melius paulatim assuevit ab ortu.
58 Proinde nemus sparsa cures de glande parandum,
59 sed tamen ante tuo mandes quam semina campo,
60 ipse tibi duro robustus vomere fossor
61 omne solum subigat late explanetque subactum.
62 Cumque novus fisso primum de germine ramus
63 findit humum, rursus ferro versanda bicorni
64 consita vere novo tellus cultuque frequenti
65 exercenda, herbae circum ne forte nocentes
66 proveniant germenque ipsum radicibus urant.
67 Nec cultu campum cunctantem urgere frequenti
68 et saturare fimo pudeat, si forte resistat
69 culturae, nam segnis humus superanda colendo est.
70 Ipsa tamen ratio nemoris non una serendi.
71 Est qui per campos spargit sine lege, sine ullis
72 ordinibus glandes, at digerit alter in aequum
73 omnia quincuncem, certis dimensa figuris,
74 ut latere ex omni, recto via limite quadret.
75 Ludicra uti fictis belli simulacra sub armis,
76 buxea composuit legio quem Schaccia ludum
77 nympha Italica quondam primum monstravit in oris.
78 Exhibet alternos tabula interpicta colores
79 atque omnis justo partitus limite campus
80 aequali et spatio et forma respondet ab omni.
81 Tuque adeo sectas seu matrum e corpore plantas
82 deponis sulcis, seu terrae semina mandas,
83 indulge ordinibus, terram juvat ordo, quod ipsis
84 divisa arboribus vires dabit omnibus aequas
85 et vacuo poterunt se rami extendere caelo.
86 At dum spem primis ostendit frondibus arbor,
87 tu procul hinc pecoris prohibe genus omne petulci
88 urentesque malo nova germina dente capellas.
89 Acer equus colles hinnitu rumpat acuto
90 liberaque immensos errent armenta per agros,
91 sed parcant nemori tenero ramoque recenti.
92 Pro quo sunt circum lento de vimine saepes
93 texendae aut fossa rivus tellure per herbam
94 ducendus, longeque greges post claustra tenendi.
95 Deinde ubi jam certos paulatim silva per annos
96 creverit et terrae radicibus haeserit altis
97 omnis ramorum ferro tollenda recurvo
98 luxuries, ne par nondum sub pondere truncus
99 succumbat ramoque animos profundat inani.
100 Quas autem quercus ima de stirpe recides
101 has se efferre solo et magis exsultare videbis
102 ceu plus accipiant ipsa de caede vigoris,
103 et quae terra humili se tollere tempore longo
104 vix potuit, tenues demum manifesta sub auras
105 assurget late ramis frondentibus arbor.
106 Cum vero validis radicibus ardua caelo
107 exierit, poteritque Notos durare frementes.

108 Vestra sub enodi describere carmina trunco
109 discite pastores et iniqui jurgia pagi.
110 Ne tamen aut ferro immiti rigidave bipenni
111 ne lucos violate insignes grandibus umbris ;
112 illis numen inest, sunt qui videre fluentes
113 roboris incisi laeso de cortice guttas
114 sanguinis et trepido ramos horrore moveri.
115 Scilicet haec quondam, priscos incesset agrestes
116 relligio, crimen pavidi qui triste putabant
117 antiquas dura quercus temerasse securi.
118 Crimine pro tali sensit Dryopeius iras
119 caelestes, ferro Haemoniam cum tollere quercum
120 ausus et infesta Dryadem violare bipenni.
121 Nymphae fida Ceres pro tam furialibus ausis
122 sumpsit ab injusto meritas Erysichthone poenas.
123 Grande nefas adeo est sacros excindere lucos
124 in quibus horrorem tenebrarum altosque recessus
125 atque umbras atque ipsa silentia vulgus adorat.
126 Nam sacer est lucis vastisque recessibus horror.
127 Et mos priscus erat quondam portare piandae
128 liba Pali quando silvam vicinia ferro
129 laeserat aut ramo lucum spoliarat opaco.
130 Ipsaque silva olim meruit Dodonis honores,
131 tempore quo quercus oracula sacra ferebant
132 fatidicae vatesque ipsos ventura monebant.
133 Cumque feret truncos arbor procera valentes
134 et sua frondosae diffundent brachia fagi
135 pastor sub ramis frigus captabit opacum
136 cum gregibus, calamoque suos cantabit amores.
137 Nil tamen incestum lucis agitate sub altis
138 pastores ; sacro nemorum sed parcite honori.
139 Vos folia et rami, vos alta silentia testor,
140 est Deus, est vestris Deus in penetralibus ultor
141 justa parum castis mittat qui fulmina lucis.
142 Sed dum per silvas pubes cantabit agrestis
143 turba aderit volucrum festo quae murmure lucum
144 personet et vario permulceat aera cantu.
145 Ipsa suae Philomela olim plorata sorori,
146 omnes implebit Terei de crimine ramos
147 noctes atque dies et conscia saxa movebit.
148 Et vestris discant volucres assuescere silvis.
149 Plurima per volucres caelum monet : improba cornix
150 saepe cava e quercu ventos praedixit et imbres
151 unde suis rebus praesagia ducat arator
152 auguriumque petat caelumque exploret et auras,
153 at lucis diras volucres absterreat altis.
154 Et cum plantabis silvam, tibi plurima et ipsis
155 quercubus est inter fagus miscenda neque altas
156 de genere hoc, duro cum robore, rejice cerros.
157 Est quoque glandifera celebris de gente supra omnes
158 iliceis regnat longe quae maxima silvis
159 aesculus ingentem nam late amplectitur umbram
160 ipsa ingens ramoque nemus facit una comanti.
161 Hanc neque profusi ruptis de nubibus imbres,
162 non venti, non durae hiemes tristesque procellae
163 convellant, altis adeo radicibus haeret.

164 His quercus sociis est semper laeta suoque
165 jungi et amat generi et cognatam agnoscere gentem.
166 Si quando armandae naves et bella paranda
167 det quercus nautis tabulata, det arma furori
168 bellantum, det ligna foco, det aratra colono
169 aut aliis alios porro sumatur in usus.
170 Sacra meo quercus numquam violabere ferro.
171 Decerpant de te ramos sumantque coronas
172 victores bello egregii quos Martia virtus
173 servato pro cive caput praecingere quercu
174 admonuit : meruit tantos haec arbor honores.
175 At quercus primos quae patria viderit ortus,
176 Maenalus an Ladon, an pingua culta feracis
177 Chaoniae ? Memorat rumor diversa vetustus ;
178 Terra doce verum rumore vetustior omni !
179 Jupiter ut perhibent vastum dum conderet orbem
180 immanes terra nati de matre Gigantes
181 protinus ausuri caelum perrumpere et alto
182 bella movere Jovi ; turbam domat ille rebellem
183 in conjuratos molitus fulmina fratres.
184 Natorum caedem Tellus miserata suorum
185 fervidum adhuc ut erat Rhoeci complexa cruorem ;
186 dum fovet ingenti de corpore tenditur ingens
187 truncus et edurum crescit de pectore robur ;
188 robur sunt humeri, fit robur et ardua cervix,
189 et totidem tollit ramos quot grandia nuper
190 centimanus vacuo jactabat brachia caelo.
191 Truncum durus arat libro septemplice cortex
192 ingensque ingenti de corpore constitit arbos
193 ipsi quam laeso pro numine terra tonanti
194 devovet ; unde deo quercus sacra cujus opaca
195 primi mortales glandem fregere sub umbra.
196 Quamquam sacra Jovi sit quercus et illius umbrae
197 constet honos, paveat tamen alto vertice in auras
198 cum tollit sese nam sicubi forte rubenti
199 tela manu quatit insultans tonitruque corusco
200 Jupiter illius frontem quatit igne superbam,
201 dum parcit myrto bonus indulgetque myricae.
202 Nunc porro reliquas nemori describere partes
203 persequar. Accedant fagis et quercubus ulmi
204 et tiliae, nec erunt silvis frondentibus alni
205 indecores, et acer ligno bicolore notatum ;
206 et quae per montes ramis uberrima pinus
207 frondosae laetum praetendit frontis honorem
208 necnon et mixtae corylis fruticantibus orni
209 et cornus teres arbor et oryctiae terebinthi
210 et piceae et loti et salices et idonea bello
211 fraxinus, at longe betulas taxosque repelle.
212 Supremos pinus montes abiesque coronet,
213 per silvam inculti teneant media omnia vepres
214 et dum tantum de spinis laedere nati.
215 Arva nuces habeant late camposque patentes
216 et quae frenando in cellis dant vincula Baccho
217 castaneae ingentes et juniperi hirsutae.
218 Ne te autem lateat quo sint discrimine quaeque
219 plantandae hae species, paucis, adverte, docebo.

220 Ut viror est ulmo laetus ramique comantes
 221 arduus alta petens turpi nec cortice truncus
 222 ulmum adhibe ordinibus quoties fundenda per hortum :
 223 sunt serie spatia ingenti tendendaque totis
 224 aestivos contra soles, umbracula campis ;
 225 una alias inter texendis aptior ulmus
 226 marginibus spatiorum exornandoque vireto.
 227 Seque adeo series plano super aequore tendat
 228 ulmorum tractu longo quantum ipsa tumentum
 229 lumina, vel gressus valeant lustrare sequentum.
 230 Tales Bellaquei viridaria fontis et hortos
 231 exornant ducti, diverso limite, tractus
 232 ulmorum immensi praetentaque brachia caelo.
 233 Hic magnis nullus spatiis modus ipsaque late
 234 et viret et quadrat versu non simplice scaena.
 235 Corycius sic ille senex qui rure paterno
 236 Oebalii coluit ripam camposque Galesi
 237 ponendas in mille modis, mille artibus, ulmos
 238 et longa campos illarum ambire corona
 239 aut rectos seriem in versus differre docebat.
 240 Arboris immensae crescit numerosa propago
 241 et docet in similes stirpem sobolescere ramos ;
 242 verum aliae obturbant aliis ni forte serendum
 243 in partes justo dirimas discrimine campum.
 244 Ipsaque Threicio vati quae tenderet umbram
 245 ulmus digna fuit cum valle rediret Averno
 246 et sese ad superos rapta bis conjuge ferret.
 247 Arduus ad gelidum mons est Rhodopeius Hebrum.
 248 Monte super citharam simul impulit umbra comantes
 249 densa simul ramos praetendit et undique multa
 250 arbore componit subitum nemus : adfuit illex
 251 et platani et salices et coniferae cyparissi.
 252 Una tamen reliquas super ambitiosa sorores
 253 ulmus tollebat sese vitemque maritam
 254 vati ostendebat qua non spernenda moneret
 255 connubia, at plantae monitus neglexit amicae.
 256 Namque viro fatale fuit socialis honorem
 257 vitavisse tori atque omnes sprevisse maritas.
 258 Nec tiliam faciles quae det spatiantibus umbras
 259 et caput alta ferat spernas plantare, sed inter
 260 plantandum memori veniat sub mente Philemon
 261 nec non Baucis anus, casti quos foedere lecti
 262 et pietas et amor, tecto sub paupere, quondam
 263 junxerat hospitio susceptus Jupiter ambos
 264 annorum jam mole gravis et inutilis aevi,
 265 esse dedit virides tilias : hinc sexus uterque
 266 servatus tiliae quae mas et femina nunc est,
 267 torno planta habilis nemori nec tarda parando.
 268 Ipse etiam in silvis non aspernandus acernae
 269 frondis honos tiliae forma foliique colore
 270 non multum absimilis rigidi sed corticis arbor
 271 informem truncum crebris arat horrida rugis.
 272 Quae se autem late partes profundit in omnes
 273 ipsa teres trunco passisque amplissima ramis
 274 pinus erit toti non ultima gloria luco
 275 aeternum quando divinae frondis honorem

276 servat et ingenti nemora inter frondea trunco
277 assurgens late silvam dominatur in omnem ;
278 grata deum matri, postquam Cybeleius Attis
279 mortales vultus truncum duravit in illum.
280 Hac olim, ut memorant vates, ex arbore victus
281 Marsya per Phoebum nudatus pelle pependit.
282 Ille terebrati per certa foramina buxi
283 cum digitis molles rudis alternantibus auras
284 conciperet lignum stulte miratus et usum
285 pastoresque inter, buxo resonante, superbus
286 carminis auctorem vocat in certamina Phoebum,
287 qui dignas vili poenas ex hoste recepit.
288 Ut se praeduri valido munimine septi
289 pinea nux contra ventos defendit et imbres,
290 ipsa potest pinus montes exstare per altos
291 impune et rapidis sese committere ventis ;
292 nam ventos amat et montes et vallibus imis
293 languet ubi tenuem ramorum proferet umbram.
294 Nascuntur passim coryli, sed cornus et orni
295 per lapidosa situ loca inaccessosque recessus
296 exsultant ventosque ultro patiuntur et imbres.
297 Alni autem et salices rivos et laeta fluenta
298 praetexunt, et prisca sibi si fabula constet,
299 ambo olim socii unanimes piscosa secundum
300 flumina lintre cavo vitam linoque trahebant.
301 Festa dies aderat pagum solemnitas in omnem
302 sacra Pali, festae lucis dum retia tendunt
303 immemores, iram divae sensere furentis.
304 Namque ut erant fluvio intentos operique vacantes
305 indignata Pales aeternum litore in ipso
306 figit et ignava duratos mole coercet
307 ad terram, longae patiantur ut otia poenae.
308 Qui tamen humor aquae praeter labentis obibat
309 aerias utrumque dedit frondere per auras ;
310 sed frondes ipso vel adhuc de crimine pallent
311 longa quibus turpes dicunt convicia ranae.
312 Tu declive solum et supremos consere montes
313 abietibus, montes laetabitur inter apertos
314 ardua per se arbor. E silva hastile recisum
315 infodiatur humo, nec multum tempus, et illa
316 in caelum late ramis ingentibus ibit,
317 neglectura Notum cursusque ausura marinos.
318 Sed per planities camporum fraxinus aequas
319 miti danda solo, non est ignobilis arbor.
320 Postquam Pelidae dedit olim Pelio ab alto
321 fatalem armipotens Hector qua concidit hastam
322 ipsa quidem frangi patiens sed nescia flecti.
323 At non Heliadum fortuna tacenda sororum
324 grandibus in silvis quae dum fraterna dolerent
325 funera populeae fecerunt semina genti
326 flavaque maerentum fletus in succina versi,
327 tam magno majus pretium fecere dolori.
328 Tu sociam nemorum gentem hanc admitte tuorum !
329 Omnibus arva licet plus haec amet Itala terris,
330 et patrem Eridanum ramo exsultante coronet.
331 His autem saltus cures implere profundos

332 arboribus, laetae veniunt namque omnibus umbrae,
333 omnes vim similem cognato e semine ducunt.
334 Et quamvis ebena dices serat India lucos
335 pictus odorato sudantia balsama ligno
336 portet Arabs, ramis depectant vellera Seres
337 thuraque de silvis veniant generosa Cilissis
338 omnibus in templis, omnes adolenda per aras ;
339 ipsa mihi Francis quae collibus edita surgunt
340 plus placeant nemora et felices frondibus umbrae
341 digestique suo per campos ordine luci.
342 Nec se vana mihi praeclaræ filia silvae
343 et genus antiquum laudarit Pontica pinus.
344 Nec jam quaesierim veteris pineta Lycaei.
345 Atque Cytoriaco natas de vertice buxos
346 aut sacra late horrentes formidine lucos
347 vallibus Idaeis atque Arcadio Erymantho.
348 Quando nec similes nec tam exsultantibus umbris
349 tollebant caelo quales nunc Gallia silvas.
350 Saepe tamen rupto pubent cum germine rami
351 aeculeaeque virent per campos frondis honores,
352 annus corruptis bacchatur pestifer auris :
353 unde gravi ferus illuvie se bruchus in ipsas
354 effundit frondes, it late exercitus ingens
355 ore vorax avido, et silvam depascitur omnem
356 necnon et glomerata modis animalia miris
357 erucae, forma horribiles et quae mala taetro
358 cantharis arboreos foetus incestat odore.
359 Illas, cultores, si vos quae cura tenebit
360 servandi nemoris, quam primum tollite pestes,
361 udi ni primos Maii rumpantur ab imbres.
362 Nec nova defodere in terram virgulta neque altis
363 sessandum veteres ferro decidere ramos
364 arboribus prolemque aliam supponere lapsis.
365 Ipsa proinde omnem per agrum tibi crebra juvenus
366 exsultet quae sedi haeres succedat avitae.
367 Et tibi sunt statuenda loco plantaria certo,
368 unde genus silvam possis differre per omnem,
369 atque novo populo gentem reparare caducam.
370 Dumque vacas nemori curando umbraeque parandae
371 plantandis te non postremam impendere curam
372 edico arbustis, horti decor unde petendus
373 phillyreae et myrto et lauro et rhododaphnae et acantho
374 gelsiminoque citrisque et tonsilibus cyparissis.
375 Planities ipsi proprior quae praejacet horto
376 carpinei nemoris partim exornanda virenti
377 praetextu, tonsa partim cingenda cupresso.
378 In tractus longos facilis tibi carpinus ibit,
379 mille per errores indeprensosque recessus
380 et molles tendens, secto ceu pariete, ramos,
381 praebabit viridem diverso e margine scaenam :
382 primus honos illi quondam post additus ordo est,
383 attonsaeque comae et formis quaesita voluptas
384 innumeris furtoque viae obliquoque recessu
385 in tractus acta est longos et opaca vireta.
386 Quin etiam egregiae tendens umbracula frondis
387 temperat ardentem ramis frondentibus aestus.

388 Quamquam autem raras bene digerat ordo cupressos
389 perpetuam in seriem, melius descripta tenebunt
390 intervalla situ certo certisque figuris.
391 Namque ut tonderi docilis fingique cupressus
392 et per se patiens in quaslibet ire figuras,
393 ipsa suo virides discriminat ordine campos.
394 Ne te paeniteat Caeae pulcherrime gentis
395 infelix Cyparisse, graves quod senseris iras
396 Silvani qui te tanto donavit honore.
397 Cervus erat quondam juveni dilectus, et ipsi
398 Silvano, qui dum frigus captaret in herba,
399 hunc puer imprudens jaculo transfixit acuto ;
400 utque suum agnovit, percussit pectora palmis
401 se miserum inclamans, non ipsum excusat amore
402 errorem factum verbis objurgat amaris
403 Silvanus durum increpitans et crimen acerbat.
404 Ille, probo victus simul oppressusque dolore
405 pertaesusque sui, lacrimarum flumine largo
406 lavit humum. Tellus isto tepefacta calore
407 de puero tecum fecit, Silvane, cupressum.
408 Olim monstrando per sese nata dolori
409 arbor erat, sed nunc ornando commoda ruri
410 si praesertim humili se pumila vertice tollat
411 et versu oblongo pratorum extrema coronet
412 hortorumque aditus, aut sicubi detumet agger
413 herbidus in terram, nutu clemente, jacentem.
414 Namque comae aeternum servans felicis honorem
415 tendit inaequales ramos cristamque comantem
416 et longum foliis viret immortalibus aevum.
417 Immites etiam fortis contemnere ventos
418 et plus laudis habet ventis agitata cupressus.
419 Tum folio nitidam semper, semperque virentem
420 tortilibus ferti nodis aut vimine lento,
421 phillyream late hortorum praetende sub ipsis
422 parietibus, virides per se namque illa tapetas
423 textu imitata suo et magnarum aulae domorum,
424 prospectu late campum oblectabit amoeno.
425 Et sic per muros errare licentius omnes
426 phillyream patiari, suis quos texere ramis
427 gaudeat et viridem passim praetendere scaenam.
428 Atque suo tenues non ille paraverit horto
429 delicias mollis qui tendere norit odoros
430 ad murum plexis scite per mutua ramis
431 gelsimini textus priscis apiaria saeculis.
432 At nisi per cratem doceas haerere salignam
433 parietibus per se trunco male fultus iniquo
434 vix constare frutex poterit, qui more tenacis
435 lascivaeque hederæ multa ambitione per omnes
436 intendit sese muros et cratibus haeret
437 lento errore sequax et ligno ductilis arbor.
438 Adde quod et faciles et centum nexibus aptos
439 et dociles fundi, longa propagine, ramos
440 explicet et ramis flores bene olentibus addat,
441 unde velint sese molles ornare puellae
442 atque ipsae matres aras ac templa coronent.
443 Ipsa peregrini tibi ne quoque copia desit

444 gelsimini, seu quod per valles floret Iberas
445 seu Lusitani quod pallet sidere caeli,
446 sive quod extremis per pontum affertur ab Indis.
447 Omnibus his species sua certa sui que colores,
448 sed non vos quamquam Zephyris spirantibus aurae
449 optatique sinant redeuntia tempora veris,
450 mollis non ego, vos hortorum gloria, flores
451 gelsimini, properare velim. Temeraria bellis
452 quam mala laedit hiems sat numquam extrema timentem
453 frigora, testis erit quantum differre iuvabit,
454 praefestinatiss male floribus invidet ater
455 saepe Aquilo, prosint alienae exempla ruinae.
456 Vos invisa igitur ne frigoris aura relictis
457 vestras perdat opes justo servare calori.
458 Non tamen ulla magis fontes ornabit et hortos
459 arbor Atlantei quam quae viret arbore mali ;
460 illi est aeternus folii decor, inter opacum
461 albecunt nitidi flores nemus, aurea ramis
462 poma micant fulvoque ardent radiata metallo.
463 Si nemus auricomum silvaeque arbusta virentis
464 corbibus in quernis felici induxeris horto,
465 semper flore novo semper ditabere pomis.
466 Unde suum accedet decus hortis et sua ruri
467 gratia. Nam pariter fructuque et flore superba
468 implebit teretes arbor spe divite ramos.
469 Ne vero, cum flos argento concolor albo
470 auriferi nemoris ramis crebescere coepit,
471 ne prohibe effusas carpando a flore puellas.
472 Ad praedam conjux omnisque domestica pubes
473 accedant et flore domus laetetur odoro.
474 Serta legant omnes et inumbrent ora coronis.
475 Nam nocet ipsa sibi viresque profundit inanis
476 luxuries, cupidis illam permittite puellis,
477 scilicet hos pro se flores in serta puellae
478 nectere amant fructuque sinus implere recenti.
479 Illius infelix Atalanta cupidine pomi
480 jam vinci se posse suo monstravit amanti,
481 quamvis ipsa viros currendo vicerat omnes.
482 At numquam vel odore novo vel ditibus umbris
483 arboris auricomae felix laetabitur hortus,
484 quin procul avertas inimicae incommoda brumae.
485 Tuque adeo rapidis violenti flatibus Euri
486 ne noceant, occurre prior munimine firmo,
487 praetentorum operum ductive crepidine muri.
488 Illa proinde citro sedes nemorique beato
489 optanda in primis quae nulli obnoxia vento.
490 Nam praeter rapidi quam vastant omnia venti
491 ipsa etiam patriam Assyriam Medosque calores
492 solis amans numquam obliviscitur aurea malus.
493 Nec ratione alia glaciale ad Strymonis undam
494 languet, ubi Hesperios exultat laeta per hortos.
495 Idcirco mollem laedant ne frigora plantam,
496 cum Boreas florum semper saevissimus hostis
497 torquet agens violentam hiemem vel nubila differt,
498 est tibi porticibus longum retinenda sub altis
499 et contra duros hiemis servanda rigores,

500 donec agat Zephyros annus solemque reducat.
501 Sic tibi florebit nemus admirabile luxu
502 perpetuo semperque novos halabit odores.
503 Diversas porro species diversaque poma
504 arbor habet : tendit citrus se gibber in orbem
505 oblongum spissoque suum sub cortice succum
506 includit : tristes gustus acidique sapes
507 sunt interdum aliis, quos ora offensa recusent,
508 quamquam cor fovet is, qui linguam torquet amaror.
509 Sunt alii gustu mites, limonia qualem
510 gens habet Etrusco quae laudatissima rure,
511 et Lusitanis malum quod venit ab oris.
512 Est etiam pomum cui primum Aurantia nomen
513 urbs antiqua dedit, sub Dircae Aracyntho.
514 Ipsa quidem citris sunt longe Aurantia mala
515 pelle magis molli et magis ubere rorida succo,
516 queis sola diversos faciunt diversa sapes.
517 At super aurifero memorant quae plurima pomo
518 carminibus Graii vates ne quaerere cura,
519 ut quondam Hesperidum fuerit cultura sororum
520 ad magnum Atlantem, Mauri sub litore ponti,
521 ut ferus in telis et caesi pelle leonis
522 Alcides per vim dites irruerit hortos
523 pomaque sopito male custodita draconi
524 primus Aventino victor plantarit in agro
525 ruraque citrigenis repleverit Itala ramis.
526 Nam sunt multa et adhuc quorum te cura requirat,
527 ut teneras myrtos et purpuream rhododaphnen
528 auricomo nemori ac pomis flaventibus addas
529 et suus est illis etiam decor et sua forma,
530 ipsi autem in primis divum de munere myrto.
531 Et quondam, ut fama est, cum primas aurea myrtos
532 plantaret Venus umbrosis in vallibus Idae,
533 festa cohors illas circum ludebat Amorum,
534 lucentem ad Lunam purae per tempora noctis.
535 Quippe Venus myrtum plantis ex omnibus unam
536 ipsa sibi optavit quondam propriamque dicavit
537 non aliam ob causam sua velant simplice myrto
538 tempora nuptae omnes ad solemnes hymenaeos.
539 Ipsa deum regina toris praefecta maritis
540 taediferas adhibet sacra ad mysteria myrtos.
541 Hinc etiam Elysiis in vallibus omnis amantum
542 turba suas et habet myrtos, et myrtea circum
543 silva tegit, quotquot nec amor post fata reliquit,
544 Phaedramque tristemque Procrin maestamque Eriphylen.
545 Is non unus honos Myrto sibi victor ovanem
546 illa nectebat quondam de fronde coronam
547 Tudertus, victisque prior de more Sabinis,
548 imposuit capiti myrtum inseruitque triumphis.
549 Ipsa arbor trunco est humili nec vertice celso
550 mollibus et foliis et ramo crebra comanti ;
551 illius et blando nymphae tanguntur odore
552 frondis et eximiae mirantur praemia formae.
553 Si calor inclemens fuerit vel frigus iniquum
554 utraque vis myrto namque est metuenda, calores
555 tu nimios nimiumque cave pro tempore frigus.

556 Unde juvet plantam quadrato includere ligno,
557 ut cum saevit hiems illam sub tecta reponas
558 aut fundas gelidos fontes dum perfurit aestus.
559 Et si qua est pietas ab acutae vulnere falcis
560 et pecoris morsu, ramos defende recentes.
561 Est quoque qui nemori citrio myrtoque virenti
562 grandibus impositam rhododaphnen misceat urnis.
563 Nam plantae alterius niveo alteriusque rubenti
564 confusus de flore decor venit additus hortis.
565 Vallibus irriguis et fontes propter amoenos
566 floret odoratis laurus pulcherrima baccis
567 nobilis aeternae cui gloria frondis obumbrat.
568 Nec quis dotibus his natam de stirpe pudenda
569 esse putet, ripa e Peneide maxima quondam
570 orta fuit virgo summi nurus esse tonantis
571 quae poterat si forte deo contenta marito,
572 audisset primos Phoebi victoris amores.
573 Ille humeros pharetra insignis spolioque superbus
574 Pythonis meritoque suo quaerebat amari.
575 Felix virgo, dei thalamos si forte rogantis
576 Solis equis caeloque omni dotanda tulisset.
577 Quamquam caelestis sprevit dum vota mariti
578 grande tulit pretium servatum nympha pudorem
579 et quos laurus habet Phoebi de munere honores,
580 quod templis toties, quod sit celebrata theatris,
581 Tarpeique Jovis postes figenda sub altos
582 summa suis late Capitolia frondibus ornet.
583 Tu sacros Phoebi tripodas, tu sidera sentis
584 tu casus aperis rerum praesaga futuros.
585 Te juvat armorum strepitus clangorque tubarum,
586 perque acies medias saevique pericula belli
587 accendis bellantum animos, te Cynthius ipse,
588 te Musae vatesque sacri optavere coronam.
589 Est etiam arborea florens de gente ligustrum
590 Persarum, volucres peregrino ex alite cristas
591 caeruleo quod flore refert ramoque comanti
592 et floret primi frondent cum tempora veris
593 atque suo virides hortos incendit odore.
594 Quid memorem quanto se Punica malus honore
595 efferat ut virides ramis fruticantibus hortos
596 ornet et ardenti ramos convestiat ostro.
597 Nam neque se quisquam florum de gente neque ipso
598 de genere arboreo simili se jactet honore.
599 Fronde super viridi multo flos aureus igne
600 et formae insignis varioque volumine crispus
601 lucet et egregio per agros splendore superbit.
602 Postquam autem flori sua denique forma recessit
603 purpureo pro flore suum se fructus in orbem
604 informat tenditque novo super orbe coronam.
605 Intus quae Tyrio sunt perlita grana rubore,
606 mille latent digesta suos ex ordine certo,
607 per loculos, ceu cum moliri cerea regna
608 coepit apis mellique suas distendere sedes
609 ordine multifido et crates fundare favorum.
610 Nam sua cuique acino cella est angusta suusque
611 ordo quem tenui saepto membrana coercet

612 durior et reliquae ponit fundamina moli.
613 Granaque sunt ori per sese dulcia tantum
614 quantum acida et mixtum referunt ab utroque saporem.
615 Unde corona autem, seu purpura mixta coronae,
616 venerit huic pomo, non est exponere longum.
617 Maura fuit prisco nomadum de sanguine virgo
618 et quantum color ille tulit formosa, sed isti
619 non par respondit fati indulgentia formae.
620 Nam patrios vates atque ipsa oracula divum,
621 dum se virgo super nimis ambitiosa rogaret,
622 responso vatam ambiguo sibi regna putabat
623 portendi, quando spondebant fata coronam.
624 Demens quae vatam potuit confidere dictis !
625 Namque triumphantis dum se referebat ab Indis,
626 illam connubii specioso nomine cepit
627 vitisator Bacchus ; mulier frustrata coronam
628 erepti retulit pretium dotale pudoris.
629 Postquam facta virens de corpore virginis arbor
630 formaque successit formae diversa priori.
631 Nec decus hortorum non juverit, horridus ille
632 sit licet et folio rigeat paliurus acuto
633 et Rhamnus spinae nomen cui contigit albae
634 frondiferumque caprifolium et silvestris acanthus,
635 alceaque Idaeusque rubus ruscique halimique ;
636 et quas mille modis ad normam ponere norit
637 villicus arbuteo fruticasas de grege stirpes.
638 Nam neque multiplices dicendo exponere formae
639 est tempus, nec jam species fas ire per omnes.
640 Ipsa horto egressis se silvis scaena coruscis
641 explicet, atque omnes divortia longa viarum
642 differat in partes et partibus omnibus idem
643 angulus et spatio respondeat unus ab omni.
644 Quamquam alias alii describunt saepe figuras
645 qui nemori obliquos tendunt involvere flexus
646 ordine ab adverso, postquam via limite recto
647 in varios tractus se longe effusa tetendit.
648 At tibi seu recto spatiorum linea versu,
649 seu forte obliquo se proferat, aureus ornet
650 pulvis iter, vel gramen humum de caespite pingat.
651 Si vobis horti nemora aut spatiosa terantur
652 non desint quae vos portent carpenta, puellae
653 et matres, ne forte pedes via longa fatiget,
654 quamquam praevalidas labor is quoque forte juvabit.
655 At de phillyrea tonsas seu ducere saepes
656 contingat nemoris virides seu tendere textus
657 carpinei, lenti seu flexile vimen acanthi,
658 in testudineum moliris flectere dorsum,
659 forcipibus crebris ramos compesce fluentes.
660 Nam nisi praesectis reprimas hastilia virgis
661 jam sua tonsilibus tolletur gratia textis,
662 si quid saepem ultra versu turgebit iniquo.
663 Et quoniam semper spatiis injussa virebunt
664 gramina, semper erit tellus purganda neque ullis
665 sordibus aut ullis tractus glaber horreat herbis.
666 Hunc autem in primis, hunc villicus ipse laborem
667 experiatur, eas partes agat ipse feraces

668 figat humo plantas et campum floribus ornet.
 669 Vosque, o solerti, famulantum turba, magistro
 670 ferte simul vestramque operam vestrosque labores,
 671 ferte alacres istique manus impendite curae.
 672 Pars habiles terras spatia ad fundanda cylindro
 673 prosubigat glebasque soli perscindat inertes ;
 674 pars horto inducat fontes rivoque sequenti
 675 et foveat plantas et temperet arva fluentis,
 676 tonsilibus pars lenta paret retinacula textis,
 677 pars nemus omne levet foliis et ruris opaci
 678 luxuriam tollat nimiam, pars rasile buxum
 679 tondeat ; hic ferro solers rimetur acuto
 680 quae caeci fodiunt sinuosa cubilia talpae
 681 sub terram repararetque solum, ferat ille serendos
 682 areolis flores, opere omnis ferveat hortus,
 683 praesertim villae certis si forte diebus
 684 exspectetur herus rauca qui fessus ab urbe
 685 dulcia secreti quaerat solacia ruris.
 686 Felix ille, gravi rerum quem pondere pressum
 687 semotum longe a strepitu, et popularibus undis
 688 interdum molli patrium rus accipit umbra :
 689 liber ubi penitus curarum animique solutus
 690 tantisper respiret et aspera diluat urbis
 691 taedia civiles permutans rure tumultus.
 692 Nam medio seu forte calor decedere soli
 693 admoneat, caelo invitet ceu vesper aperto
 694 laetari summosque super se tollere montes,
 695 ut se prospectu camporum oblectet amoeno,
 696 blanda fatigatam mulcebunt gaudia mentem.
 697 Ipse autem lucum seu fors errare per altum,
 698 cum matutinae rumpunt nemus omne volucres
 699 mugitusque boum de valle audire reducta,
 700 cum pastae sese referunt ad tecta juvencae,
 701 seu flores lustrare suos, seu visere fontes,
 702 seu villam curas malit differre per omnem,
 703 nescio qua laetam captus dulcedine mentem
 704 insanos jam non aulae, non urbis honores
 705 respiciet. Nam plus silvae rivi que placebunt
 706 et quae pura venit puro de rure voluptas
 707 gramineusque torus vel simplice somnus in herba
 708 quam foribus domus alta pavimentoque superba
 709 porticus aut variis pictum laqueare figuris,
 710 aut exquisitae per tecta opulenta columnae
 711 rupibus excisae Mauris Indove elephanto
 712 atque illusae auro Belgisque tapetibus aedes.
 713 Hunc ego, Saturno quondam regnante, putarim
 714 mortales primos vivendi habuisse tenorem,
 715 cum primae quercus oracula prima ferebant.
 716 Omne aevum in pratis molli sub graminis herba
 717 ducebant montesque suos sua flumina norant.
 718 Nondum Romanis rupes Tarpeia triumphis
 719 dives erat ; rarae, septem sub montibus ibant
 720 ad pastum pecudes et vallis Aricia viles
 721 vix bene pascebat pratis Laurentibus agnos.
 722 Multa alia ipse etiam possem praecepta referre
 723 quae ruri passim ornando nemorique valerent,

724 ni pars restaret coepti properanda laboris
725 aspiceretque ratis portus jam fessa propinquos.

HORTORUM LIBER TERTIUS. AQUAE.

H_3 v.1 Vos liquidi fontes et stagna sonantia rivis,
2 speluncae vitreique lacus et amoena fluenta,
3 deliciae hortorum atque umbrosi gratia ruris,
4 numinibus vestris, vestro succurite vati,
5 si sensum fontes, si flumina numen habetis.
6 Fas mihi terrarum caecos penetrare recessus
7 et qua perpetui manent ab origine rivi
8 dicere et unde suos habeant vaga flumina cursus.
9 Quis tam dives aquae thesaurus ? Quove perennes
10 tam jugi porro replent se fonte lacunae.
11 Ipse mihi egregiam ducendis fontibus artem
12 monstranti dandumque hortis hac parte decorem
13 villicus accedat tota cum gente docendus,
14 ornando nihil ut desit quod serviat horto.
15 Tuque o curandae partes qui sumere villae
16 instituis fundoque suum moliris honorem,
17 vosque omnes cultum hortorum formamque professi
18 floribus et silvis latices inducite crebros,
19 namque animi silvis et floribus inde petendi.
20 Quaerat aquae fontes et terrae concava tentet
21 et vocet in rivos collectam vallibus undam
22 qui mea formandus venit ad praecepta colonus.
23 Ne deserta siti jejuno in tramite tellus
24 langueat atque solum morientibus aestuet herbis.
25 Non erit ille labor durus tibi, sicubi rupes
26 in caelum attollat sese de colle propinquo,
27 namque supercilio vicini collis ab ipso
28 semper erit largae vis plurima quam tuus undae
29 exprimat et campum fossor deducat in omnem.
30 Nonne vides rapidum Ligerim ingentemque Garumnam,
31 quique Parisiacos fecundat Sequana campos
32 et Rhenum et Scaldim et Rhodanum, magnumque fluentem
33 Danubium atque alios descendere montibus amnes
34 sive cavis subter spatium sit inane cavernis,
35 hospitium undarum seu quod spirabilis aer
36 inclusum frigus rupis cum sensit opacae
37 paulatim in tenues longo fluit agmine rivos :
38 unde ipso tepidae sudant humore cavernae,
39 quales marmoreis guttas stillare columnis
40 humenti caelo et bruma nigrante videmus.
41 Rupibus idcirco ex altis permanat aquarum
42 roscidus humor et uberibus flent omnia guttis,
43 seu quod per montes altos tellure sub ipsa
44 imbribus e caelo ruptis nivibusque solutis
45 multarum sese vis plurima cogit aquarum

46 ima petens donec jam copia viribus auctis
47 tum demum erumpat campoque insultet aperto.
48 Nec desunt quorum melior sententia menti
49 qui perhibent fontes genus altum accersere ab ipso
50 Oceano. Nam totum orbem circumfluit ingens
51 Oceanus magnae subter spiracula terrae
52 qui subit in tenues fusus ceu corpore venas
53 it sanguis totique facit commercia moli.
54 Quo fit uti numquam crescat ripisque redundet
55 pontus ubi vasti de partibus omnibus orbis
56 undique tot tantis concurrunt fluctibus amnes.
57 Interior nam cum raro sit corpore tellus
58 inque specus altos imperfossosque meatus
59 interdum descendat et in loca concava sidat,
60 unda maris rarae per curva foramina terrae,
61 perque sinus ipsos furtivo lubrica lapsu
62 paulatim insinuat sese caecumque per imos
63 aut quaerit calles iter aut molitur eundo.
64 Atque ubicumque magis ruptae se viscera terrae
65 diducunt crebroque patent adaperta meatu,
66 tum largus magis atque magis se fundit aquae fons.
67 Idcirco latices manant ex aequore falso
68 non falsi ; nam cum multum tellure sub ima
69 multiplices se per salebras et acerba locorum
70 perque cavos flexus et inaequales per arenas
71 torsit agens maris unda, salis quae crassa marini
72 materies haerebat aquae purgatur, et omne
73 ceu per cola means vitium detergitur undae.
74 Nec per se haeret aquis ullus sapor aut color ullus
75 quos terra de matre petunt ; hinc saepe nocentes,
76 saepe salutiferas vario discrimine vires
77 pro varia tellure, videbis ducere lymphas.
78 Tales Borbonios, tales fas credere fontes
79 Pugiacos, succo affecit quos terra salubri
80 per quam sublapsi medicatum hausere liquorem,
81 unde omnes per se valeant avertere morbos,
82 nec vim tantam alibi poteris sentire medentum
83 nec tam praesentem divum cognoscere curam.
84 Ergo tibi labor is primum impendendus ut horto
85 inducas fontem vicino e colle petitum.
86 Nam vicinus aquam collis dabit, undique terram
87 late ipsum circa montem et declivia montis
88 assiduus fodere et ferro explorare memento.
89 Si natura soli fontes sperare vetarit
90 qualis gleba gravis vulgo perhibetur arenae,
91 quaesitos voto rivos optabis inani.
92 Vidi ego, qui fontes horto dum forte rigando
93 quaereret et fosso nullos reperiret in agro,
94 creber aquam, votis nil proficientibus, omnes
95 orabat superos nec aquam per vota ferebat.
96 Et qua Medonici sese subducere colles
97 incipiunt, vir nuper erat ditissimus unus
98 qui fuit in Francis ; nam fundi largus opimi
99 ingentes campos centum vertebat aratris,
100 huicque suas et opes atque auri magna talenta
101 Rex servanda dabat, regni pro rebus agendis.

102 Ille domum jam tum supremo in monte pararat
103 magnificam limenque domus praetenta sub ipsum
104 planities, late campum assurgebat in omnem
105 arduum opus totique agro spectabile et urbi,
106 nec fundo deerant horti silvaeque virentes,
107 non compos late pulcher prospectus in omnes :
108 sed fontes deerant et aquae nullique per herbam
109 errabant rauco ludentes murmure rivi.
110 Ergo cavae ferro penetrantur viscera terrae
111 atque omnes pariterque operas artisque magistros
112 convocat ipse loci dominus nec sumptibus ullis
113 parcit aquae cupidus, major quoque fontis habendi
114 per non tentatas crescit fiducia terras.
115 Quin etiam fontes, ipsa de nocte, repertos
116 somniat et voto vigilans se pascit inani.
117 Namque omnem late loca per declivia campum
118 rimanti totoque solum sub monte moventi,
119 nullarum prorsus se spes monstrabat aquarum.
120 Difficiles adeo pro conditione locorum
121 interdum terrae fonti inveniuntur habendo.
122 Ipse ergo grates invento fonte colonus
123 persolvat superis et numen ruris adoret :
124 "Hoc ego pro vobis, vos hoc praestate coloni."
125 Quamquam saepe cavis tereti siphone colonus
126 ducit aquas puteis, et quos natura recusat
127 arte facit fontes. It machina pensilis alto
128 e tubulo lymphas motu siphonis anhelo
129 quae sursum attollat moles licet ipsa repugnet.
130 Qualis aquas sub ponte novo Samaritis ab imo
131 excelsa educit fluvio eductasque refundit.
132 Si quem forte suo non antlia juverit usu
133 illius oret opem sola qui voce liquentes
134 percussa de rupe potest deducere rivos.
135 Ne tamen artis opem conatu quaerat inani
136 explorator aquae, nam multos terra fefellit,
137 arcani fontis dentur quae signa monebo.
138 Si pendens tumulis et collibus edita crebris
139 vel juncis fruticosa vel othlibus algida tellus,
140 aut si mollis erit limosa uligine campus
141 quique frequens herbis et caricis uber acutae,
142 hic dabit indicium laticis manifestus et ipsa
143 intus aquae carecta dabunt tibi signa latentis
144 quique soli fundo crescit condensus aquosi
145 muscus et humentem laetata conyza per algam
146 batrachiumque siumque et arundiferae calaminthae.
147 Cum diverso igitur de colle coegeris undam
148 errantem subjectum illam curabis in hortum
149 deduci. Ducendi autem non unica fontis
150 est ratio. Sunt qui plumbo testave receptos
151 vallem in subjectam soleant traducere fontes,
152 si via praesertim fuerit non longa latexque
153 colle in pendenti vena uberiore repertus.
154 Nam si cogendis et adhuc de valle propinqua
155 multiplicandus aquis venae non uberis ibit,
156 ille cavi angusto sub terram pariete saxi
157 includendus erit, quo defluus imbribus humor

158 vicinoque latex circum de rure coactus,
159 insinuans sese, muri per saepta meando,
160 agglomeret cursusque patens se laxet eunti.
161 Ne tamen unda fluat per iter salebrosa malignum
162 perque sinus caecos aut sordes ducat ab ipsa
163 terrarum eluvie, spatia inter certa locorum,
164 rivi cursum omnem putealibus infode fossis.
165 Nam planum per iter raperet quem cursus aquarum
166 limus iners fundo puteorum haerebit in imo,
167 nec poterunt raptae fossam transcurre sordes,
168 cursu interceptae medio immersaeque lacunis.
169 Et quamvis caveae tractus penetrabitur altam
170 omnis subter humum, puteis tamen omnibus exstent
171 sublimes speculae, per quas vel turbida caeno
172 unda repurgetur vel fundo prorsus ab ipso
173 quae sordes se forte cavo infudere patenti
174 mittantur labesque omnis tollatur aquarum.
175 Nec mihi nec quisquam sumptus persuadeat istos
176 rure in privato ducendo impendere fonti,
177 quos quondam Arcolio fecit Medicaea sub alto
178 Lutetiam ad magnam, quando deduxit in urbem
179 pontibus impositos tanto molimine fontes.
180 Admirandi operis moles praecelsa superbos
181 pariete perpetuo sublime assurgit in arcus
182 suspensique fluunt grandi sub fornice fluctus
183 qui cursu late excisos labuntur eodem
184 per montes ac per substructas aggere valles.
185 Nam paries quadro jungit divortia saxo
186 per quem magnarum cursum frenavit aquarum
187 regina et totam fontes divisit in urbem,
188 hos autem quamvis admittat publica sumptus
189 pro populo fortuna tamen privata recuset.
190 Vosque mihi hic estis, quibus est res ampla, monendi
191 ne fors ducendo census pro fonte paternos
192 contingat vobis expendere ; vidimus istis
193 sumptibus eversasque domos absumptaque nuper
194 praedia magna, modum discant servare modesti
195 nec per compositos testa ex arente canales
196 ducere aquam pudeat proclinatasque per alnos.
197 Namque alnos perhibent ducentis fontibus aptas.
198 Fortunatus at ille suos qui praeter euntem
199 jugis possit aquae rivum traducere in hortos
200 absque alni aut testae plumbive canalibus ullis.
201 Quale Parisiaco lymphis pernobile in agro
202 Berniacum, largos uber cui Bivara fluctus
203 transfundit cursuque locum circumdat amoeno.
204 Tale Liancurtum, tales in finibus horti
205 Burgolii Andinis rapido qua flumine pulcher
206 it per agros Ligeris lateque effusus apertas
207 Salmurii in valles cursu resonante superbit.
208 Talis et ipsa etiam (sineres, natura) fuisset
209 quae vates Musasque suo jam provocat omnes
210 murmure multarum Polycrone dives aquarum.
211 At non te pigeat, fons o pulcherrime, vilis
212 si thalamus valli errantem confundat iniquae
213 nec cursum satis aequa tibi det terra decentem

214 per Sancaronios saltus callesque malignos,
215 vel sic Lamonidae placuisti. Si tamen, o si
216 uber ut es rigui laticis lymphaeque perennis
217 rure Bavillaeo flueres hortosque rigares
218 Lamonios, tibi laeta foret fortuna neque esses
219 de Themidi fidis, credo, postrema deabus.
220 Jugis enim quae lympa fluit de divite vena
221 praetereuntis aquae neque longos passa canales
222 plus juvat et fragili non est obnoxia plumbo.
223 Nam plumbum interdum rimas agit, ipsaque rimis
224 effluit et per agros misere deperditur unda ;
225 et fit semper aquae captivae injuria quando
226 ingenio per agros vult liberiore vagari.
227 Quod si non rivi jugis tibi lympa propinqui
228 contigerit, non longe horto cava perfode vasti
229 stagna lacus sub humum, quo se mox omne receptet
230 collectarum altis de montibus agmen aquarum
231 et cretosa imo sternatur glarea fundo
232 labentem per se, nam glarea distinet undam.
233 Qua vero fontes omnem ratione per hortum
234 quove modo rivos, qua digerat arte colonus,
235 quos quibus omnis aquae motus moderetur habenis
236 expediam : te nil horum nescire juvabit.
237 Mille modis dociles rivos et mille figuris
238 dispensare potes : me discere cuncta magistro
239 sustineant, veniunt porro quicumque docendi.
240 Ut quaesitarum tibi gratia prosit aquarum
241 sunt ad vicinas valles hortumque sub ipsum
242 arce includendi latices plumboque premendi.
243 Nam nisi pressa diu et presso glomerata canali
244 non alte erumpit venis bullantibus unda.
245 Multi saepe etiam tubulis utuntur aenis,
246 impetus ut rigido veniat magis acer ab aere
247 compressaeque tubis assurgant altius undae.
248 Ne tamen aut plumbi ductu aut frenantis aeni
249 inclusi caeco luctentur turbine venti
250 irrumpantque tubos et inania claustra pererrent,
251 unde gravi ipsa etiam cum vento exaestuet unda
252 perscindatque sinus omnes et vincula rumpat,
253 spiramenta tuos inter miscenda canales,
254 ut tenues laxet liber se ventus in auras.
255 Haud aliter quam cum cellis nova vina Falernis
256 spumantique cado infundit frenisque coercet
257 vinitor, ilignis aperit spiracula costis.
258 Ni faciat costas violento protinus aestu
259 quippe omnes rumpat vinum solvatque catenas.
260 Ergo cum latices hortorum in limine primo
261 collectamque jugis partiri coeperis undam,
262 in primis medio fons constituendus in horto :
263 per se uber tubulo qui sursum erumpat ab arto
264 quasque accepit aquas caelo ventisque remittat.
265 Fontem ipsum amplexus fundo labroque capaci
266 circumeat tumido seu graminis aggere muscus
267 sive laborato de marmore conditus orbis.
268 Proque tubo interdum variis simulacra figuris
269 imponunt, phocas alii Scyllasque bifformes,

270 infusos alii rigido Tritonas aeno.
 271 Ut Lucemburgo qui semifer exstat in horto
 272 jactum fundit aquae Triton delphine superbus,
 273 marmoreoque labri quamvis circumdatus orbe
 274 nobilis Arcolica fons Lucemburgius unda
 275 Sanclovio cedat fonti, quo laeta Philippi
 276 tantum Aureliadae jactat se villa suosque
 277 undarum egregio lucos commendat honore
 278 et pagum domino se principe jactat in omnem
 279 qui meruit primos populique et regis amores.
 280 Hinc et aquae jactus vobis exempla petenda
 281 conciliare decus vestro qui quaeritis horto.
 282 Ille alios unus longe supereminet omnes,
 283 cui non Francigenis certet de fontibus ullus
 284 aut tantum fluere, aut se sic efferre sub auras.
 285 Quadri namque lacus medio de gurgite plumbum
 286 os aperit tumidum lymphis, stridentibus unda
 287 erumpit scatebris et iter rimata solutum
 288 turbinis in morem rapido petit aethera jactu
 289 ceu rotet undantem liquidum per inane sagittam,
 290 exsultant alti latices lapsuque sonanti
 291 unda superfusam plaudendo verberat undam,
 292 dum cadit et labrum roranti perpluit imbre.
 293 At qui primus aquis fuerit salientibus ortus
 294 exponam, dubio ni sit pro teste vetustas.
 295 Phasidis ad ripam lecto cum robore pubis
 296 Argolicae quondam Graia rate claviger ibat
 297 Alcides et parvus Hylas comes ibat eunti.
 298 Altus erat fagis terra in Bithynide lucus
 299 Ascanium ad fontem quem praeter Thessala pinus
 300 dum vehitur placida Minyae potiuntur arena
 301 aequore defessos artus in litore ponunt,
 302 Ipse autem longe socios praeit impiger omnes :
 303 Alcidae dilectus Hylas fontesque requirit.
 304 Ut ventum ad ripam quam de cervice gerebat
 305 gramineis urnam ingentem deponit in herbis
 306 lassus et extremae sedit sub margine ripae.
 307 Tum pater Ascanius, thalamo sub fluminis imo,
 308 Inachiam pariter matrem pariterque sorores,
 309 Isinque atque Ephyram atque Lycaonidem Melaninam
 310 et quaecumque lacus vicinaque rura colebant
 311 Indigetes nymphas mensis acceperat altis.
 312 Et vidit prior Isis Hylam obstupuitque videndo
 313 miratur pueri vultus oculosque nitentes,
 314 jamque fatigato herbaque in viridante sedenti
 315 et parat insidias et spe praesumit amantem.
 316 Ipse autem dulces ripa dum tollit ab alta
 317 pronus aquas lapsus seu forte fefellerit udo
 318 margine pes, pondus sive illum oppresserit urnae,
 319 labitur, Isis adest labenti prompta, sed ille
 320 instantis nymphae auxilium fluctusque refusos
 321 dimovet et nisu per aquas luctatur inani.
 322 Adsunt et nymphae comites puerumque morantem
 323 patris ad Ascanii pendentia pumice tecta
 324 invitant, harum sit ut his quoque numen aquarum.
 325 Dum refugit nec habent jam brachia lassa vigorem,

326 fons fit aquae fontisque deus cui nympha repulsa
327 vindictae indulgens et jam crudelis amando
328 addidit excelsum ingenium moresque superbos
329 communem contra qui sese tollat aquarum
330 naturam nisuque altum irrequietus anhelō
331 nequicquam affectet, sequitur nam jugis euntem
332 lapsus et ex ipsa trahit ambitione ruinam.
333 At puer interea toto sub litore frustra
334 Alcidae quaesitus, eo clamante sonabant
335 Ascanides passim ripae collesque propinqui,
336 omnis Hylam rupes et Hylam nemus omne vocabat.
337 Mutatusque locum primus salientibus undis
338 fecit Hylas nymphae durus dum spernit amores
339 Isidis et fontes ipsos fugisse laborat.
340 Hinc salientis aquae celebres quaesita per hortos
341 et virides lucos una non arte voluptas,
342 nam varios pariterque modos pariterque figuras
343 addidit artis opus varium erumpentibus undis.
344 Cuncta Ruellaeo poteris quae visere ruri,
345 insignes tot ubi, tam magnis sumptibus undas
346 extudit egregii monimentum illustre laboris
347 Richelius, magnis ferret dum pondera rerum
348 consiliis regnique vices pro rege teneret.
349 Hic et digestos vario discrimine fontes
350 aspicias duci in praecipua sursumque reduci
351 inque omnes motus et in omnes ire figuras.
352 Hic et aquae jactum patulo vomit ore chimaera,
353 horrendum stridens, vasto nam fusus ab ore
354 it torrens spumantque rotati gutture fluctus
355 et dum se partes motus draco versat in omnes
356 terret circumstans violenta aspergine vulgus.
357 Inde tubi molem incurvi venator aenus
358 tendit in excubiis positus mortemque minatur.
359 Verum fatifera plumbi pro glande repentes
360 ejaculatur aquas et torto flumine saevit.
361 Frustrati risus vulgi plaususque sequuntur.
362 Sed quid speluncis memorem quam multa sub altis
363 ars ludit per aquam cum desuper intus ab imbre
364 artificii scatebrisque frequens stridentibus omnis
365 perpluitur locus et latices rumpuntur aquarum
366 insultantque solo, salientes undique rivi
367 grandibus humectant guttis pendentia saxa.
368 Sed quos non lusus, antri fontisque magister,
369 quae non per dociles molitus ludicra lymphas ?
370 Quamvis ista velint aliis praestare jocosae
371 Naiades, antra levi si quando scrupea tofo
372 moliri liquidosque parent inducere fontes
373 antris et lapides ipso ex oriente petitos
374 atque Erythraea suae conchylia nectere rupi,
375 aedificent alii manantia fontibus antra
376 pumice multicavo vel conchis summa lacunent,
377 quae per diversas concinnent rite figuras,
378 cuncta olim melius proavis incognita nostris.
379 Haec inhians oculis quaerat spectacula vulgus
380 quae populo exhibeat per tempora certa magister.
381 Tu grandes prudens et aquas et seria rerum

382 semper ama, lapsus quo sit librandus aquarum
383 disce modo, labris ut magna capacibus altos
384 impleat unda lacus fluvios imitata fluentes
385 stagnave tranquillae referens spatiosa paludis.
386 Ipse tuus si forte tubus satis oris habebit
387 accipiat fontem largum longeque remittat.
388 Nam placet ubertas in fontibus ipsaque semper
389 copia, quaesiti pars est et magna decoris.
390 Nec simili librandam modo similique figura
391 est aqua per jactus, in aquis si ludicra quaeras.
392 Effingunt alii ruptos e fontibus imbres
393 multifidis, alii radios et lumina solis,
394 emissas alii cornu e stridente sagittas,
395 verum alii rapida fluctus vertigine raptos
396 in praeceps, Siculae seu parva exempla Charybdis,
397 orbis in angusti labro describere tentant.
398 Unda agitata salit ceu cum crepitantibus ardens
399 aestuat in flammis liquor exsultantis aeni.
400 At de praecipuo latices errare jubebis
401 fonte redundatos crebrisque excurrere rivis
402 per campum, ipsi etiam stagnum accipiantur in amplum
403 currentes rivi, ne quid perdat aquarum.
404 Nunc quibus errantem frenis ars temperet undam
405 dispensetque omnes sua per divortia rivos
406 describam. Licet indociles aqua libera per se
407 ire vias semper velit obsequiumque recuset ;
408 tu tamen ipse potes rivis imponere morem
409 et certos illis per humum describere cursus
410 erroresque viae ambiguos flexusque locorum,
411 quos unda interdum cursu fraudata tenebit
412 legitimo. Rivi crebris nam saepe morandi
413 flexibus et justa per campum ambage tenendi.
414 Talis Aymone per agros errasse putatur
415 Neptuni postquam injustos audivit amores.
416 Nam virgo infelix violatae plurima famae
417 praemetuens sese cursu vitabat eodem
418 atque sequebatur, nondum se forsitan amantis
419 senserat illa dei factam de numine rivum
420 qui pariter fugiens sese pariterque secutus
421 circuitusque trahens sua per vestigia longos
422 implevit variis Dircaeum erroribus agrum.
423 Fusi igitur per mille vias fugientibus undis
424 undique praecipitent, secto sub gramine, rivi,
425 pars rapidis passim loca per praerupta fluentis
426 excurrat, qualis multo tumefactus ab imbre
427 dat sonitum saxi glomerato vortice torrens,
428 pars timido cursu per humum trepidare labore
429 obliquam, quaesitus obex cunctetur euntem,
430 perstrepat ille cavas arguto murmure valles
431 insultansque solo tenues assurgere in iras
432 discat et imbelli jam saxa lacessere pulsu ;
433 jam ripae intentare minas et litora circum
434 nequicquam obstrepere et spumis aspergere truncos.
435 Quique fluit jam parcus aquae raucoque per herbam
436 in strepitu tenuis sine re, sine nomine rivus
437 si quando rivos vicina e valle minores

438 accipiat quondam in magnum se tollere flumen
439 audebit pontesque pati grandesque phaselos.
440 Persultet mollem laetissimus iste per herbam
441 aut musco in viridi, dum silvis ille sub altis
442 rauca gemit callesque minis objurgat iniquos.
443 Si quis erit, varios poterit qui tendere cursus,
444 aut tua prata riget lymphis aut sternat opimo
445 rura luto camposque ferax oblimet inertes.
446 Si tamen altus eat multa est tibi mole docendus
447 haerere in ripis et molli parcere prato.
448 Cum vero rivi rumpuntur fontibus et cum
449 vere natant udo valles atque imbribus atris,
450 prata nemusque solo contra defende regesto,
451 ne campum labes ultro se fundat in omnem.
452 Utque omnes rivos eadem non forma decebit :
453 sic et diversas rivis intendere ripas
454 riparumque toros vario discrimine disce.
455 Floribus hos, illos herbis et gramine puro
456 atque laborati praetende crepidine saxi.
457 Obscenas ripis velet sua canna paludes
458 aut celebres fulicis ranisque loquacibus algae.
459 Nulla tuos ornet puro nisi gramine rivos
460 herba, fluat nitidis ubi fons argenteus undis
461 aut aequale solum fulva sternatur arena,
462 quod virides ulmi praetextu frondis opacent.
463 Nam rivi ornandi ripis cultuque juvandi.
464 Dumque ibunt jusso loca per declivia cursu,
465 vallibus este viae faciles nullique morentur
466 si properent lapsi ripa e pendente lapilli.
467 Fontibus ipsa autem rivisque frequentibus omnis
468 silva sonet : nemorum turbate silentia, fontes,
469 murmure non uno turbate silentia, rivi,
470 perque omnes luci flexus aditusque viarum
471 undique sint latices, animos qui stirpibus addant.
472 Dumque suis oculosque tuos animumque tenebunt
473 deliciis rivi permulcebuntque morantem,
474 fors erit ut vitae subeat mortalis imago,
475 quae fluit instar aquae rapidoque obnoxia fato
476 it praeceps, nec fas longam sperare colendo.
477 Et vitae incertos quando meditabere casus,
478 fors erit ut tecum reputes quo turbine rerum
479 qui, quam difficiles agitent mortalia fluctus.
480 Forte etiam dices, quando te rivus habebit :
481 sic ibat Simois, sic tu, Penee, fluebas,
482 sic Hypanis, sic Volcus aquas Amasenus agebat
483 Partheniusque rapax et currens lene Melanthus,
484 atque Borysthenio tumefactus ab amne Dyraspes,
485 et pater Inachus, cum Naupactoo Acheloo.
486 Ars etiam reliquis cum fontibus addere et horto
487 magnarum certos lapsus monstravit aquarum,
488 quales abrupti per summa cacumina Jurae
489 perque Alpes ipsas de rupibus ire videmus
490 et sola terrarum per praecipitata refundi.
491 Et perhibent qua parte gravem devertit ad Arcton
492 Americae duroque rigens pertunditur Euro,
493 trans magnum Oceanum ripae Canadensis ad oram

494 inter perpetua nigrantes abiete lucos
 495 praecipites altis labi de montibus amnes,
 496 cum sonitu horrendo tanto perculsa tumultu
 497 ripa omnis gemit et valles silvaeque profundae.
 498 Hosque Ruellaeis imitatae Naiades hortis
 499 undarum casus alta de rupe ruentum
 500 artis opus summae virides fecere per hortos.
 501 Ardua stat caelo rupes et rupe sub alta
 502 ingens multarum se copia rumpit aquarum,
 503 in praeceps, crebra spumant aspergine fluctus
 504 perque gradus fracti certos et iniqua locorum.
 505 Fit sonitus, ceu cum torrens infrenis ab alto
 506 monte ruit, terra ingenti gemit icta fragore
 507 substrati silices rorataque saxa fluentis
 508 planguntur fluctu, toto sonat avia luco
 509 horrendum tellus, longe omnis silva resultat.
 510 Si tibi forte jacens aequali contigit hortus
 511 terrarum tractu dorso cui nullus iniquo
 512 immineat collis praeruptave vertice rupes
 513 unde caducarum lapsus modereris aquarum,
 514 ipse reclinato clementis ab aggere clivi
 515 ordinibus longis lapsuros digere fontes.
 516 Undarum lapsus sic est metata suarum
 517 Nympha Liancurti, namque horti margine in ipso
 518 rivorum longos herboso ex aggere lapsus
 519 disposuit, sed non alta de rupe, cadentum.
 520 Par ratio hujus aquae thalamo quam fusa sub aequo
 521 it laevi de rupe fluens interque fluendum
 522 tenditur attonsis ceu cum mantilia villis
 523 carbaseive sinus caelo panduntur inani :
 524 sic gracili labens se textilis unda fluento
 525 explicat et lato exundans se margine tendit.
 526 Non tamen hos lapsus, non haec ludicra requiras
 527 si latis tibi stagna patent ingentia ripis,
 528 atque effusa labris thalamisque capacibus unda
 529 ducenda in rivos et agrum fundenda per omnem.
 530 Pro qua te terrae ingentes aperire lacunas
 531 extra alios fontes et in inferioribus hortis
 532 praecipio, quo se errantes demittere rivi
 533 assuescant fontesque omni de parte redundant.
 534 Nam neque tam graciles rivi fontesque placebunt
 535 quam magni tractus undarum atque aequora lata.
 536 Proinde cavos seu forte lacus quadrataque circum
 537 stagna pares late grandi effodiendus hiatus
 538 alveus abscissa circum tellure patenti
 539 aequandus thalamo fluviorum altaeve paludi.
 540 Ipsum autem vallum circum supraque quod omnem
 541 continet amplexu ripam, ne forte sub undis
 542 persidat quadri fundandum pariete saxi
 543 caementique solum multa compage tenendum.
 544 Namque ipsi et lapides, ipsa et caementa, fluenti
 545 subsedere et aquae interdum et fecere ruinam.
 546 Ergo ne dubita firmas opponere moles
 547 aggeribus murorum et aquas sua ripa refrenet.
 548 Implebuntque lacus vacuos de partibus horti
 549 diversis jussi per campum accedere fontes

550 et centum rivi, centum de fontibus urnas
551 replendo numquam cessent invergere stagno.
552 Ipse suos vidi qui de torrentibus altis
553 implevere lacus, et quas ex imbre coacto
554 per campos passim vallis collegerat undas
555 ornare labro ingenti ripisque receptas.
556 Tale Bavillaeo stagnum memorabile ruri
557 nymphea loci domino legum jam praeside major
558 fortunaque domus dives meliore paravit.
559 Nam per semirutas prius ibat languida moles
560 unda nisi hiberno forsitan gravis imbre tumeret,
561 scabraque destructae manans per rudera villae
562 per se fontis inops et pulverulenta fluebat,
563 hancque Bavillaeae Sancaronidesque juvencae
564 post pastum, cursu in medio, potare solebant,
565 quam poteram pedes ipse levi transmittere saltu.
566 At domino cum venit honos accessit et ipsi
567 deinde loco. Nam quae junco male tecta palustri
568 ibat parva quidem, magnis sed debita fatis,
569 grandi accepta lacu jam piscibus unda natatur
570 dives aquae plenoque tumet spectabilis alveo,
571 et videt interdum magni capita alta Senatus,
572 civiles dominos rerum legumque magistros,
573 fessos urbe, suis per gramen ludere ripis.
574 Jactus aquae stagno in medio stridentibus undis
575 erumpit, totum lapsu qui personat hortum.
576 Nec te magnarum minus oblectabit aquarum
577 ambitus excisum gleba ducendus in orbem
578 forma decens hortos, scenis si silva coruscis
579 vernantes ripas ramo pendente coronet
580 gramineique tori purove sedilia saxo.
581 Et seu constet iners riguus seu profluat humor,
582 silva coronet aquam praetexens frondibus altis
583 omne latus totique loco det frigus et umbram.
584 Sunt dulces et aquis et amicae fontibus umbrae.
585 At non hic querulae confuso murmure ranae
586 antiquas lites et jurgia longa recantent :
587 hinc abige indignas, imo nam gurgite limum
588 turba maligna movens permiscet cuncta tumultu
589 sed puras late per aquas et flumina, multus
590 ludat olor pictique volent per flumina lintres,
591 et non una tuos perstringat palmula fluctus.
592 Ne tamen, ah ! nimium ripis ne credite matres,
593 perfida vestrarum forsitan nescitis aquarum
594 arbitria. Alcyone miseri post fata mariti
595 crimen fecit aquis, fecit crudelis Elisae
596 Anna soror, fecere viri, fecere puellae,
597 qui mersi toties altis periire sub undis.
598 Numen adorandum undarum ne talia vestros
599 cultores florum patiantur fata per hortos,
600 hostibus haec potius contingant funera nostris.
601 At ne discedam longe aut jam exorsa relinquam,
602 ut tibi et ipsa etiam longis spatiosa fluentis
603 arva natent, variis diversi et partibus horti
604 unda omnis collecta ingentes stringere ripas
605 gaudeat ipsa ingens et recto aequabilis alveo.

606 Nam non ulla magis riguis aqua fontibus hortos
607 commendat thalamo quam cum praetenditur amplo
608 uber aquae rivus villa spectandus ab omni,
609 latifluosque sonans per agros se gurgite pandit,
610 tamquam legitimum ripis ac nobile flumen.
611 Nec praecepta juvat praeceptis addere longis
612 ut si quae fuerint istam monstranda per artem,
613 praeterea longo durus tibi carmine texam.
614 Vos alii, si quae super his discenda requirant,
615 vos adeant, domino nuper florente, beatae
616 o valles, videant digestos ordine fontes,
617 quot constricta solo subter plumboque fluenta,
618 quique quot in formas fontanam ivere per artem
619 multifidi fontes ornataque fontibus antra.
620 Vos adeant, riguis dudum celeberrima lymphis
621 rura Liancurti, praetentaque gramina visant
622 et quam mille modis Schombergia duxerit undam
623 nympha loci custos, ruri praefecta marito,
624 teque adeo in primis quae principe nobilis unda
625 Bellaquei Naias longe o pulcherrima fontis,
626 Franciadum regina tenes moderamen aquarum.
627 Nec sese ulla tibi patriis quae regnet in oris
628 Nympharum anteferat nec tantum affectet honorem.
629 Te fontes patriique lacus, te Gallica semper
630 flumina, te latis gaudet qui Sequana ripis
631 atque Parisiaca jactantior influit urbi
632 externique colant fluvii, Mavortia Tibrim
633 Roma suosque tibi submittat Graecia fluctus.
634 Nam tu dives aquae et lymphis opulenta beatis,
635 una super reliquas tantum memorabere lymphas
636 quantum alias inter celebratur Gallia gentes.
637 Illam et perfunctus bellis et pace potitus
638 et toties victor Lodoicus grandibus auxit
639 nuper aquis scopulosque novos molitus ab alto
640 undarum lapsus, magnum decus addidit hortis.
641 Sed quid ego immensos latices fontesque superbos
642 commemorem, quanto se porrigat unda canali
643 unda ingens, immensa, gravi quae fluminis instar
644 majestate fluens it ripis lata profundis.
645 Illa suo toties decerni litore vidit
646 fortunas populorum et missos undique ab orbe
647 regum oratores vario qui supplice cultu
648 arbitriumque suum peterent pacemque rogarent.
649 At non divitias fontis vacat ire per omnes
650 Bellaquei, nec quos hortis Lodoicus honores
651 addere molitur, nec vos regalia tecta
652 tot regum fundata opibus luxuque beato
653 florentes hortos jam fas memorare canendo.
654 Nec si fas esset me dicere cuncta parantem
655 jam sinat audiri quae regia limina circum
656 omnis fama tubis sonat omnibus. Aspice quali
657 laetitia plaususque domus jam ferveat omnis,
658 ex quo aulam partu implevit Lucina verendo
659 Delphinique sacris totus natalibus orbis
660 applaudit, certae portat qui grandia pacis
661 nascendo auguria et denuntiat otia terris.

662 Dum sua nympha domus celebrat jam gaudia dumque
 663 magnanimum ingeminat Lodoicum pace sub alta
 664 regnantem populis et dantem jura quietis,
 665 ruris opes reliquas sperandaque dona colono
 666 persequar atque suis donandos fructibus hortos.

HORTORUM LIBER QUARTUS. POMARIUM.

H_4 v.1 Nec te adeo, aestivum flores quae laeta per annum
 2 non dicam, Pomona ; tuis hic omnia quando
 3 muneribus sunt plena tuoque assurgit honori
 4 autumnus, viridi praecinctus tempora ramo.
 5 Quae tibi pars etiam nostri spectanda laboris,
 6 Lamonide, atque sui dum per te denique venti
 7 aspirant et te porro ratis auspice, coeptum
 8 tendat iter pelagoque volans det vela patienti.
 9 Et quamquam vultu leges Astraea severo
 10 imponat per te populis luxumque refrenet,
 11 te tamen et ruris dantem praecepta colendi
 12 vidimus et morem arboribus legesque ferentem.
 13 Namque omnes cultus, species, genera omnia fetus
 14 arborei prostant per te descripta colonis.
 15 Munere pro tali sic te tellure benigna
 16 deinde tuus fortunet ager sic divite fundo
 17 luxuriosa tui curvent pomaria fructus,
 18 laeta Bavillaei rumpantur ut horrea ruris,
 19 atque tuae numquam desit sua gratia villae.
 20 Quamvis non omnis tellus sit idonea plantis
 21 omnibus et certas leges, ac foedera certis
 22 praescribat natura locis praescriptaque servet.
 23 Illis Franca tamen non est obnoxia tellus
 24 legibus eximiae quae fertilis ubere glebae
 25 nil fructus non laeta ferat, nil culta recuset.
 26 Et quamquam multo generosos palmite colles
 27 In primis longo tollat Burgundia tractu,
 28 quamquam pomiferis laetetur Neustria campis,
 29 Belsia frumentis sit opima, Bigerra metallis,
 30 Benharnus nemorosa, racemiferique Tricasses,
 31 nutritor pecorum Biturix, Arvernus equorum ;
 32 est tamen omne solum Francae telluris, alendis
 33 hortorum arboribus rurique insigne colendo.
 34 Praesertim riguae tellus vicina Turoni,
 35 ver ubi perpetuum semperque nitentia prata
 36 et quos lentus Arar praecepsque Druentia campos
 37 perluit et pinqui vallis rorata Garumnae,
 38 vosque Parisiaci ditissima praedia ruris.
 39 Si tamen ipsa tuo tellus optanda patebit
 40 arbitrio, glebae fundus quaerendus opimae.
 41 Nam tellus vitanda gravi quae languet arena
 42 necnon quae pressos interjacet infima colles

43 convallis, cui lenta palus exhalet inert
44 de fundo terram crassa cum nube Mephitin,
45 unde gravem referant etiam sua poma saporem,
46 et fuge perpetuis campum qui flatur ab Austris.
47 Optimus ille locus vobis, haec optima sedes
48 arborei fetus, ubi caeli mitibus auris
49 declives campi, terra pendente, patebunt.
50 Et licet apricum ad solem ventosque tepentes
51 vergat ager, non ille tamen removendus ab horto
52 florifero ; spatio sua sint divortia justo
53 floribus et pomis, sed ferri ingentia claustra
54 clatrorum ordinibus dirimant pomaria longis
55 defendantque aditus, populo pecorique cavendos.
56 Non jam telluri qui sit delectus habendae
57 hic repetam, moresque ipsos habitusque locorum
58 plantandique modos et tempora certa serendi :
59 omnia jam vulgata. Quis illicet hactenus omnem
60 monstratum agricolis culturae nesciat usum ?
61 Si vero arboribus per se satis aequus alendis
62 non sit ager, fossa terram proscinde patenti
63 et sterilem late non impiger effode campum,
64 proque solo exhausto meliorem suffice terram.
65 Haec melior graciles quae fundo imitatur arenas,
66 si tamen illius color est bonus et bonus humor,
67 campus alit nimias, si sit nimis humidus, herbas.
68 Et ne planta solo forsan male discrepet ipsi,
69 quaere prius terram fructus qui quamque decebunt,
70 vitibus an sit ager magis ingeniosus habendis,
71 an magis arboribus, nam per vim nulla coacti
72 gratia ruris erit, ne ruri proinde colonus
73 naturae contra morem ingeniumque coacto
74 imperet ; invitae fit enim violentia terrae.
75 Cum fuerit jam stratus ager tellusque parata
76 in primis ipsum, certo discrimine, campum
77 partiri plantisque ratas describere sedes
78 mandabo ; et postquam lecta de gente Cydonin
79 optaris, decerpe manu vel tolle securi
80 silvestrem ramum terraeque immitte tepenti,
81 nec pigeat scrobibusque manus adhibere cavandis
82 sternendoque solo. Te talem impendere curam
83 arboribusque tuis primos imponere mores
84 proderit et sectos ipso de corpore matrum
85 arboreos fosso ramos deponere campo.
86 Nec fuit indignum quondam, dum prima vigeret
87 Persarum fortuna alto de sanguine magni
88 Astyagis regem campos coluisse superbum.
89 Saepe illum patrios flores et poma per hortos
90 plantantem manibusque suis plantata rigantem
91 attonitus vidit mons vertice Tmolus ab alto,
92 et regem agricolam longe miratus Orontes.
93 Ipsaque per valles quondam videre Sabinas
94 deposito fastu trabeatos rura Quirites
95 et tractare manu rastrum atque incumbere aratro.
96 Hanc etiam, ut perhibent, sese formabat ad artem
97 cum domito Fabius dictator ab hoste redibat
98 non veritus, medio dederat qui jura senatu,

99 ferre idem arboribusque suis terraeque colendae
 100 victricesque manus ruri praestare serendo.
 101 Ipsa triumphales tellus experta colonos
 102 atque ducum manibus quondam versata suorum
 103 majores fructus, majora arbusta ferebat.
 104 Talis foedifragum postquam Masinissa Syphacem
 105 et Numidam infidum Poenis fregisset in arvis
 106 imperiiis terram ipse suis parere docebat,
 107 atque suo cultu Maurum mansuescere caelum.
 108 Tu quoque regnando curas dum dividis orbi
 109 nonnumquam solio ut perhibent descendis ab alto
 110 et quas imperii, quas rerum tendis habenas
 111 rure tuo, magne interdum Lodoice, remittis.
 112 Nam Sangermani seu te accepere recessus,
 113 seu juga Versalii sive alta palatia fontis
 114 Bellaquei, per te curando incumbere fundo
 115 non dubitas. Circum famuli stant ordine longo
 116 centum qui pomis, centum qui floribus hortos
 117 conserere ingentes et aquas deducere certent
 118 artificumque vices varias operumque laborem
 119 per medios instans operi partiris ut agrum
 120 omnia sint paribus numeris dimensa per omnem.
 121 Interea tellus placidi te ruris amantem
 122 gratatur tantoque solum cultore superbum
 123 plus viget atque suo se laetum indulget amanti.
 124 Sed quid ego haec autem ? Non hortatoribus istis
 125 tempus eget, quando laus est nunc ista potentum
 126 hortorum arboribus sese oblectare colendis.
 127 Nec talem fas est te denique spernere curam
 128 si te ruris amor sperandaque gaudia villae
 129 atque fruenda suo te partu poma tenebunt.
 130 Omnem autem impendas operam, nullumque laborem
 131 arboribus, nullos cultus praestare recuses.
 132 Nam neque te tantum tellus nec sidera tantum
 133 telluri per se conspiratura juvabunt,
 134 quantum ipse assiduus cultus praestandaque jugis
 135 cultura arboribus. Cultu mollite frequenti
 136 tellurem agricolae, tellus mansuescit arando.
 137 Si quid peccabunt soles caelique maligni
 138 cruda intemperies, si venti imbresque nocebunt,
 139 has cultura vices supplebit et ipsa coloni
 140 sedulitas. Testis Marsorum e gente vetusta
 141 rusticus, is tenuem coleret dum sedulus hortum
 142 vicinos inter cum cetera rura vacarent,
 143 unus abundabat pomis, unius in horto
 144 rumpebant ramos fructus segetesque nitebant.
 145 Haec digna invidiae visa est fortuna ferendae.
 146 Thessalicas hortum cultor curare per artes
 147 et per quaesitas, Marsis in montibus, herbas.
 148 Dicitur ac magicis segetes urgere venenis.
 149 Res delata foro, causam sub iudice dicit
 150 rusticus, ostendit nitidos cum falce ligones,
 151 et solitos usu e longo splendescere rastros :
 152 "Ecce meum crimen, dixit, mea noxa, Quirites,
 153 splendida de cultu, jugique labore supellex,
 154 hi magici cantus." Simul haec, simul horrida tendens

155 brachia, monstrabat natam cum matre Sabella,
156 duratasque operi longoque a sole rubentes.
157 Et causam obtinuit laudata Quiritibus ipsis
158 sedulitas. Adeo jugis labor utilis arvis.
159 Hinc fruges veniunt nitidae ramique comantes
160 arboribus, gaudent ipsae fetuque beato
161 luxuriant splendentque sui per poma colores.
162 Rastri ergo durusque bidens forfexque bicornis
163 at carri et marrae et vectes teretesque cylindri
164 instrumenta horti niteant, situs arma tubasque
165 inquinat et galeae campis volvuntur inanes :
166 candida pax agros porro fortunet et urbes.
167 Si tamen hortus opem, cultum si terra recuset,
168 mitte recusantem perdat ne vota colonus
169 nec culturam aliis pigeat traducere campis.
170 Nunc vero arboribus potior quae forma serendis
171 dicendum coepti pars non postrema laboris.
172 Sit locus in primis omni secretus ab horto
173 spes ubi se generis late numerosa propaget,
174 et seges arboribus per campum prima paretur
175 exsultetque solo passim confusa juvenus,
176 qua poteris lapsae gentis farcire ruinas.
177 Ex acinis autem nucleisque frequentibus omnis
178 educenda tui soboles pulcherrima ruris.
179 Hinc indiscretam nullo discrimine prolem
180 horti per muros omnes, per et ipsa vireta
181 suffice. Nam melior quae primo assuevit ab ortu
182 terrae ipsi, seu terra suis credatur alumnis
183 aequior unde ipsi cognata alimenta capessant,
184 seu quod opem promptam facilis vicinia praestet
185 sedibus et proles melius succedat avitis.
186 Sed nati in primis generosa e stirpe petendi
187 qui patrios referant animos primumque vigorem.
188 Haec melior tibi planta frequens cui nodus ; at illam
189 rejice quam raras ipso pro cortice differt
190 per ramos et longa per internodia gemmas.
191 Interea populo sedes statuenda futuro
192 ad solem. Sine sole tuis non poma venirent
193 arboribus glebaque solum langueret inertis.
194 Ille et ventorum tempestatumque supremus
195 arbiter ingentem lustras dum lumine mundum
196 cuncta fovet succisque herbas vitalibus implet,
197 et duodena suum dum temperat astra per orbem
198 terrarum caelique vices moderatur et anni.
199 Multum adeo rutili servet qui lumina solis
200 seu quo extrema cadens variaverit ora colore,
201 sive quibus primos maculis infecerit ortus,
202 et caelum rite observet, juvat arva, neque illum
203 nequidquam caelo aspiciet sol magnus ab alto.
204 Magnum ergo in primis Solem Solique sororem
205 cum qua supremi regnum partitur Olympi
206 rite omnis tecum pubes respectet agrestis.
207 Ambo boni arboribus de caelo sidus utrumque
208 servandum agricolis, signa indubitata sequuntur
209 et solem et lunam. Tu numquam auctoribus istis
210 discernas si rite suos in utroque colores

211 diversi incerto caeli terrebere vultu.
212 Non tamen immodici soles de vere vovendi
213 ne quod restabit frigus tua vota refutet,
214 et solem arboribus qui fors male faverit ipsis
215 accuses, si poma suum properata venirent
216 ante diem ; flos ipse licet tibi germine laeto
217 promittat fructus, flori ne fide caduco,
218 donec poma coquat maturis solibus aestas.
219 Saepe sibi mendax sperato pignore pomus
220 defuit et vano decepit flore colonum.
221 Interdum extremi sub finem veris ubi annus
222 intepuit florentque omnes jam laeta per hortos
223 poma, improvisis arbos deprensa procellis
224 una nocte omnem longi spem perdidit anni ;
225 immitesque magis regnant hoc tempore venti,
226 et turba Boreas immansuetissimus omni
227 magnam hortis stragem dedit arboribusque ruinam.
228 Idcirco primi dum florent munere veris
229 arborei fetus, vobis, o rustica pubes,
230 ipsae aerae, et venti, tempestatesque cavendae
231 per fastos, precibus praesertim avertite crebris
232 noctibus aestivis tristes a frigore lunas
233 nubigenasque Notos et Sithonios Aquilones.
234 Saepe nocent etiam numquam imprudentibus imbres
235 provisi satis agricolis : si nubila caelo
236 pendebunt, memor anteveni et praesagia caeli
237 observa assiduus signataque tempora fastis.
238 At cum certa suis diversi mensibus anni
239 venerit insitio et ramos includere truncis
240 tempus erit sectoque oculos imponere libro.
241 Si fuerint ut erunt tibi tardi poma saporis
242 tolle illaudatos fructus atque elige mites.
243 Vos hinc praecipuam cultores quaerite laudem
244 hortorum, vestris hunc addite rebus honorem,
245 externasque piros peregrinaque poma per hortum
246 accipiant patrii, fisso sub cortice trunci.
247 Hinc melior soboles et justis copia fetus.
248 Ipsa quibus careas, praestet vicinia fructus
249 et quibus ipsa etiam vicinia forte carebit,
250 quaere vel extremo studiosus ab orbe petendos.
251 Prima olim terris eduxit Achaia plantas
252 barbaricis victrixque suos traduxit in hortos,
253 quos etiam toties mutatis fructibus auxit,
254 quando prisca suas implebat fabula partes.
255 Hinc Moro nova fata, novos fecere colores
256 Pyramus et Thisbe magnam Babylonis ad urbem,
257 quos impermissi deluserat error amoris.
258 Et deserta suo Rhodopeia Phyllis amanti
259 litore sub solo fecit de funere plantam
260 infelix, patrio cum crevit Amygdalus horto.
261 Et vites Baccho primum ficusque repertae
262 et Cereri inventae fruges et oliva Minervae.
263 Quid memorem ut Tiberim victor Romanus ad altum
264 saepe triumphatos peregrino e litore fructus
265 attulerit, cerasos ipsa ut Cerasunte petitas
266 Lucullus patrii primus plantavit in hortis,

267 ut sua mala urbi Medus, sua pruna Damascus,
268 Lydiaque atque omni cum gente Aegyptus et Indi
269 et Persae Caresque securiferique Geloni
270 ac domitae longo portarent agmine gentes.
271 Tum Junonicolae primum sua rura Falisci
272 grandibus implerunt, uno non ordine, pomis,
273 Crustumiasque piros Amiterna valle Sabini
274 plantarunt magnumque olea vestire Taburnum
275 coepere Aurunci agricolae Bacchoque frequenti,
276 miratusque novas Anio per litora plantas,
277 atque suos omnis tum demum Oenotria tellus
278 undique fructiferas stirpes induxit in hortos
279 pingui laeta solo caeloque beata salubri.
280 Cum vero stirpes optaverit insitor omni
281 e gente egregias emendatique saporis
282 et vegetae pubis jam robora lecta pararit,
283 discat adoptivos truncis imponere ramos.
284 Nec modus est simplex nec res operosa colono
285 ligno infelici felicem includere ramum.
286 Namque alii truncos per se capita alta ferentes
287 excindunt ferroque cavant, ceu robora quando
288 quadrifidasque sudes findit lignator, et alte
289 fit truncum in teretem cuneo via, deinde cacumen
290 felicis rami robur descendit in imum.
291 Ipso alii geminas inter pro cortice gemmas
292 incidunt oculos circum germenque receptum
293 udo deinde docent paulatim inolescere libro.
294 Verum aliis fissus tenuis ceu fistula cortex
295 aut arbos scuti in morem diffissa rotundi
296 aut solidus ferro truncus terebratus acuto
297 accipit immissas, solido sub stipite, plantas.
298 Sedulus interea conjuncta stirpe putator
299 obligat incisum sparto septemlice ramum.
300 Aut pice perfundit truncum cerave liquenti,
301 ne pateant rimae caeli non mitibus auris
302 atque intercluso via dividat aere succum,
303 et sua deinde neget jam plantae alimenta receptae.
304 Tum si rite omnis res cesserit ipsaque constet
305 per sese insitio, si ramum ramus adoptet,
306 connubio e tali fuerat quae moribus arbos
307 ante feris silvestrem animum deponet et ipsam
308 dediscet matrem, succos oblita priores.
309 Duraque tum cornus flavensque cydonia pomis
310 curvabit ramos bicoloribus, et bona tristes
311 pruna ferent spini, pirus emendata nitebit
312 inque alio cerasus florebit adultera trunco
313 interdumque arbos ramis diversa sub uno
314 stipite poma feret partu spectanda biformi.
315 Nunc quibus expediat varios confundere fructus
316 foederibus quales ramis jungere ramos
317 quae quibus hospitium praestent virgulta monebo.
318 Ipsa piri solido genus omne cydonia trunco
319 suscipit atque suo pingit suscepta colore
320 nec refugit proprium pomo miscere saporem
321 cana pirus fruticique genus praestare saligno.
322 Mutua quin etiam cum moro foedera ficus

323 servabit taetrum si temperet illa colorem.
324 Lauro etiam inseritur cerasus partuque coacto
325 fundit adoptivum per virginis ora ruborem.
326 Ipsaque confusos cum pomis poma sapes
327 miscebunt prunusque pirum gestabit agrestis,
328 Palladii si dicta fidem meruere magistri.
329 Omnia quae patrios, per longa exempla, colonos
330 dedocet ars, aetas quondam quae prisca tenebat.
331 Inserit in salices pomos Arvernus, at illae
332 quamquam poma bonum ostendunt speciosa colorem
333 degenerant tristemque ferunt de foedere tali
334 blanda per eximiae pellis mendacia gustum.
335 Nunc variis quae plus caeli natura solive
336 conveniat per se plantis noceatve cavendum.
337 Humentis campo pomus caeloque tepenti
338 gaudet, eam si per colles et saxa reponas
339 vix poterit fructus vitium excusare caduci.
340 Ipsa genus terrae crudum durare valebit
341 ficus, Hyperboreo si terga obverterit axi,
342 persicam arena juvat si perluat humor arenam,
343 plantatae si forte piro non largior aura
344 defuerit, caeloque tepor contingat aperto
345 humentique solo tantisper planta juvetur,
346 flores implebunt ramos fructusque tumbent.
347 Cunctatrix autem siccam super omnia terram
348 morus amat, moro jugis nocet humor, et ipsum
349 corrumpit pomi tellus nimis uda saporem.
350 Sed passim cerasus laetam e radicibus imis
351 pullulat in prolem ceu quando Oenotria tellus
352 crescentem ostendit sobolem fruticantis olivae.
353 Terram optat mitem citrus, flavensque cydonis
354 austeram ; tellus urens non aequa ferenda est
355 Armeniae, est cerasis tofus fragisque sinister ;
356 sed si telluri mandentur fraga subactae
357 et sulco ex humili soli exponantur aprico
358 implebunt teretes succo magis ubere baccas.
359 Quique favent Baccho colles, sunt saepe maligni
360 et peponi et citro quae gaudent mitibus auris.
361 Quando prunus erit fundum sortita tepentem
362 ipsa sui pomis replebit vota coloni.
363 Si qua tuis autem pomus videatur in hortis
364 languida, per cultus est praemedicanda receptos
365 ante gravis truncum morbus quam ceperit omnem.
366 Saepe mali arboribus cultu telluris iniquae
367 intereunt per agros sentes herbaeque malignae,
368 unde nocens ramos languor veniebat in omnes.
369 Cultus et in plantis fructus emendat acerbos.
370 Ergo proscisso qui saepius aequore campum
371 ipsis subjectum arboribus circumque jacentem
372 suscitaret et rastro vertat ferroque bidenti
373 majores ramis animos et fructibus addat.
374 Salsus ager plantis et qui perhibetur amarus
375 omnibus infelix, non illum cultus avari
376 agricolae, non longae hiemes gelidaeque pruinae
377 non aerae curant ventis pluviaeque frequentes,
378 nec genus ille suum pomis nec servat honorem.

379 Omnia degenerant naturam oblita priorem.
380 Verum ubi fructiferis sedem delegeris aequam
381 arboribus, varias plantandi discere formas
382 incipe, nam varia pro condicione locorum
383 sunt variae species. Alios quibus arva patebunt
384 apricum ad solem, mitis sub sidere caeli,
385 proceris campum arboribus plantare jubebo,
386 pumila per dumos aliis arbusta placebunt
387 trunco humili ramoque brevi cinctuque rotundo,
388 dum muros alii late digesta per omnes
389 componunt virgulta suis retinenda catenis.
390 Quae ceu per tonsas alii longo ordine saepes
391 consortis in se ramis distendere norunt.
392 Omnibus his decor est ruri quaerendus et horto
393 conciliandus honos quem tot diversa decebunt.
394 Ante tamen quae per patrios sunt scripta colonos
395 his super observes. Mori nam multa vetusto
396 artibus ut pollens istis, haec addidit aetas,
397 culturae formam longe superavit avitae.
398 Tu campo teneros fructus ne crede patenti,
399 quales sunt ipsae ficus, a sole coquendae
400 aestivo, caelo sed liberiore fruuntur
401 grandia poma, nuces, pruni cerasique pirique,
402 quaeque omnes fragilis tolerabit amygdalus auras.
403 Fructibus et justum si conciliare saporem
404 atque boni ingenium succi moresque benignos
405 forte velis, illos caelo propone patenti.
406 Namque tibi fructus meliores proferet arbos
407 quae plenum ad solem luci se pandit apricae.
408 Seu quod qui fructus caelo nascuntur aperto
409 plus opis accipiant pleni de lumine solis,
410 sive quod ingenti trunco procerior arbos
411 longe plus ipsa petit a tellure vigoris
412 et proli interdum plus succi ducit alendae,
413 seu quod de media caeli regione sereni
414 purior arboribus summis afflabitur aer.
415 Ergo rite omnes primum sunt poma per hortos
416 solibus exponenda, quibus percocta saporem
417 accipiant atque aestati duranda ferendae.
418 Ut vero prolem teneram tueare benignis
419 indulgens studiis majoraque corpora formes,
420 stringe manu frondes et acuto decute ferro
421 luxuriam nimiam, nec matrem ramus opacet
422 ipse suam nec onus ramo quod ferre recuset
423 imponas. Fetus praesertim tolle caducos
424 donec prolem aliam propria jam mole valentem
425 videris atque suo meditantem vivere succo.
426 Sic poteris magnos pomorum educere fetus.
427 Sed matri blandire, bona quam prolis ademptae
428 frustratam de parte, tuo solabere cultu.
429 Nec tu cultori quae forte placebis avaro
430 ne numerum jactes arbos fecunda nocentem,
431 Ipse nocet numerus, sed ferro cultor adunco
432 ut sit honos matri, fetum rescindat inanem,
433 quin et nulla diu multos impune per annos
434 fertilis arbor erit : non est durabilis ulla

435 fertilitas, fetu nimio laesura parentem.
436 Et nisi cessando requies alterna levarit
437 fecundas, non illae aevum durare valebunt.
438 Prudens cultor eris, si quando hortabere pomos
439 interdum ut cessent, nec si cessare volentes
440 urgebis cultu, laudemque merebere magnam.
441 Ipse suburbanos memini vidisse per hortos
442 cultores multos, qui festinata frequenti
443 poma fimo urgerent properato crescere partu,
444 monstrarentque novos alieno tempore fructus.
445 Ne pueri, ne talem hortis inducite morem,
446 hi fructus perimunt plantas uruntque ferentes.
447 Ipsa importuno virgulta peresa veterno
448 ante diem tristis senserunt damna senectae.
449 Sed sinite ut justo veniant in tempore fructus.
450 Ne vero immiti pendent dum poma colonus
451 vellat acerba manu, duro ne laedat ab ortu
452 matrem ipsam stomachumque gravet ni mitia carpat.
453 At si magna sui teneat te cura coloris
454 fructibus addendi, muro praetende propinquo
455 pomiferam longo ramorum ex ordine gentem
456 cui, medium rapidus cum sol transcenderit axem,
457 immineat, primumque reflexo ardore calorem
458 augeat et justis pingant tua poma colores,
459 si murum fuerint pulchre digesta per omnem.
460 Quo nunc deinde modo solis captanda reflexi
461 gratia fructus uti sit pictior inde monendum
462 atque ars augendi ad murum monstranda caloribus.
463 Principio paries ducendus tramite longo
464 obversus solem ad medium, nam sole petenda est
465 a medio justis potius mensura caloribus.
466 Murum ipsum vivae praetextu perline calcis,
467 calx omni solem melius de parte reflectit
468 levis et ingenitos exurit torrida vermes,
469 stragem olim arboribus magnam exitiumque daturus.
470 Tum ferri ad murum series praefigitur unci
471 cui contos late intendunt cratesve salignas,
472 virgeus unde omnis ramorum pendeat ordo.
473 Vimineis autem ramos devinciatur hamis
474 villicus et murum componat rite per omnem.
475 Ast illos alii melius per tortile ferrum
476 parietibus tendunt longis nodoque coercent.
477 Ipsum ultro rigidis lenti per tempus habenis
478 parebunt rami : primis si forte sub annis
479 ire doces sub vincla suas ut discere partes
480 a teneris sensim incipiant longoque subacti
481 obsequio, toti assuescant insistere muro.
482 Nam quae obduruerint longos virgulta per annos
483 tendere parietibus studio tentabis inani.
484 Ut partes igitur ramus se liber in omnes
485 flectat et imperium facilis promptusque sequatur,
486 assuescat sensim obsequio dum mollior aetas
487 id sinit et dociles veniunt ad vincula virgae.
488 Omnem ergo generis murum plantare sub ipsum
489 arborei sobolem primis hortabor ab annis,
490 paulatim per se vinclis parere docendam.

491 Ipsa etiam ramos non dedecuerunt fluentes
492 vincula si murum justus quadret ordo per omnem.
493 Femina vittatos ceu cum sub vincla capillos
494 ire iubet crinemque rata sub lege reponit ;
495 dum parat ire foras et se praebere videndam,
496 crinem vincla decent, pars est bona laudis in illis.
497 Sic bene digestis ipso pro pariete ramis
498 quantumvis arbor fuerit captiva decebit.
499 Si nihil emineant rasis hastilia virgis
500 et murum viridis praetextus vestiatur omnem.
501 Illa decens series pictos imitata tapetas
502 murum omnem campumque suo commendat honore,
503 praesertim certos quando variare colores
504 incepere suo varii pro tempore fructus.
505 Tum vero vigili quae non speranda colono
506 gaudia pomiferi cum per divortia muri
507 livebunt ficus et Persica mala rubebunt,
508 curvabuntque graves late pomaria ramos ?
509 Nam quando aestivus pomis bicoloribus annus
510 pingitur, omnis opes per sese opulenta beatas
511 ad murum laetis sub frondibus explicat arbos.
512 Tum juvat et fructus et munera divitis horti
513 et villam lustrare omnem juvat arva videre
514 mirarique suos, per ramea texta, colores
515 et tempestivos ipsis decerpere fructus
516 arboribus plenisque domum portare canistris.
517 Sive autem explores, tua dum pomaria lustras,
518 quae sint poma bonae stirpis profitenda, quod ipsis
519 ingenium arboribus, plantae qui cultus alendae,
520 quando exsultantis reprimenda licentia rami,
521 quae sit adoptandis plus commoda fructibus arbos,
522 quatenus incisae servent sua nomina pomi,
523 rure tuo superabis opes fastusque potentum.
524 Nec jam te foeda ambitio urbanique tumultus,
525 non favor instabilis vulgi, non gratia regum,
526 non spes vanae animi nec inania vota movebunt.
527 O fortunati quos afficit illa voluptas !
528 Nam seu crescentes spectent ex ordine plantas
529 sive laborantes pomorum pondere ramos
530 sustineant contoque levant virgulta bifurco.
531 Sive peregrinis ponant nova nomina pomis
532 seu gustu exquirant cujus sint quaeque saporis
533 pruna vel exportent mensis epulanda secundis,
534 quae non quam laeta formabunt gaudia mente.
535 Tuque adeo pulchri ducit quem gratia fructus
536 arboribus dispone suas, pro pariete, sedes,
537 diversaque memor quamque in statione repone ;
538 cum cerasis cerasos, cum ficibus insere ficus,
539 crustumiam Syriamque pirum conjunge Britannae,
540 nec viridi pomo prunum confunde rubentem.
541 Gens omnis cognata solo jungatur eodem.
542 Omnes par cultus par et fortuna manebit ;
543 omnibus et sedes amplas curabis alumnis
544 ad murum, strictis si non urgebere rebus,
545 ne si forte locus non sit satis omnibus aequus,
546 pabula deficient et succum terra recuset.

547 Sed non fructiferis quantum natura genusque
548 sit varium arboribus facies quam multa quibusve
549 cultorum patrios ars fructibus auxerit hortos,
550 dicere me speciesque omnes evolvere fando
551 attinet aut longo properantem errore teneri.
552 Nam quid ego ipsa olim missas a Perside pomos
553 quive sapor fructus, quae purpura mixta colori
554 commemorem ? Cujus pars ipsis ossibus haeret
555 carne magis spissa, pars rarior ossibus ultro
556 exuitur rigoque tumet bene roscida succo,
557 una super fructus longe laudatior omnes.
558 Pars carne exili faciemque simillima pruno
559 distendit nulla sparsam lanugine pellem.
560 Nec species formasque omnes aut nomina dicam
561 pomorum, seu quae de montibus Armenus olim
562 attulit ipse suis, nativo picta rubore,
563 seu quae de grandi ligno plantabat in hortis
564 Alcinous, dulci seu quae Tiburtia succo
565 cedunt Picenis. Quid mala Cydonia jactem
566 et quae de nullo plus commendatur odore ?
567 Nec bene vos primis cerasa acceptissima mensis
568 nec vos divino spumantes nectare ficus
569 transierim, quibus eximii pro munere gustus
570 major venit honos quam vobis, mitia poma.
571 Sed numquam plus ipsa sibi natura suoque
572 indulset genio quam cum tot deinde figuras
573 impressit brevibusque piris gravibusque volemis
574 et tam diversi fecit discrimina succi.
575 Pars vino propior rores generosa Falernos
576 exprimit ad gustum, pars altera mitior ori est
577 rore suo musti vires imitata benigni,
578 pars collo stolide obliquo absurdeque tumentis
579 crescit in oblongum, non uno tubere, ventrem.
580 Ipse etiam prunis suus est honor et suus uvis
581 praesertim adverso jungit quas pertica muro ;
582 et quae purpureae vites apianaque vina
583 rite suas obeunt, ipso pro pariete, partes.
584 Forte etiam peponis blandum fragrantis odorem
585 et quas praedulci succo natura rubentes
586 implevit costas et humi repentina fraga
587 ni nimis urgeret res jam properanda referrem.
588 Muro intendendae cum dant praecepta coloni
589 arboris, aut palmae mandant, fundatur apertae
590 in morem passis uno non stipite ramis,
591 aut spinae in speciem ductae de tergore piscis
592 cui spissi trunco rami fruticentur ab uno.
593 Mos ut uterque bonis jam magnum auctoribus usum
594 obtinuit, te neutrum hortis adhibere vetabo.
595 Esse autem arboribus momentum grande putandis
596 et moneo, et creber repetens repetensque monebo.
597 Namque suum ramis caedendo imponere morem
598 ipse potes quos tu porro in quamcumque vocaris,
599 per ferrum faciles ibunt docilesque figuram.
600 Arboreum cultro genus omne colonus adunco
601 informet ramum attondens fingatque putando
602 cum sua jam ramis accessit fortibus aetas.

603 At cum caesa suo de vulnere pullulet arbos
604 spemque novae faciat virgae percepta cicatrix,
605 ne dubita ferro durum exercere frequenti
606 imperium, arboribus facies formanda putando est.
607 Omnis et ut primis aetas est saepe sub annis
608 fetibus imprudens atque inconsulta ferendo,
609 has tenerae partes per se juvet ipse putator
610 arboris et ferro ramos compescat inanes.
611 Ipsaque sub vestras veniat lascivia leges,
612 o famuli, prima luxum emendate juventa
613 et ramos tondete : nocet clementia ramis.
614 Sed quo quique modo, qua sint de parte putandi,
615 tu per sollertes prudens exquire magistris.
616 Parcendum semper primoribus unde futuri
617 spes fetus tibi certa atque exspectanda propago.
618 Inde autem aspicias pomosos crescere fetus
619 per murum et pulchro dives laetabere fructu.
620 Nam neque plus molis neque plus habitura coloris
621 poma putes quam quae soli percocta reflexo
622 ostendunt longo digestos ordine textus.
623 Et cultu e tali poterit qui plurimus esse
624 fructus erit. Tu morem alium ne quaere doceri
625 et licet hanc artem per sese deinde repertam
626 aetas nostra ferat, fructusque calore coquendos
627 monstrarit per vim solis vi parietis auctam,
628 hanc tamen antiquis obscurus rumor ab annis
629 deducit magnoque valens pro teste vetustas.
630 Et si vera fides longo quae venit ab aevo,
631 Alcinous rex idem hominum cultorque peritus
632 hortorum, talem primus Phaeacibus agris
633 dicitur arboreos fetus coluisse per artem.
634 Regia more suo rumpebant horrea fructus
635 immensi, viridis se spes ubi prodidit anni
636 contigit ut foedam spirans de turbine brumam
637 per noctem, Boreas omnem populaverit hortum.
638 Si qua autem tanta forsitan de clade superstes
639 arbor erat, laeta per agros quae fronde vireret,
640 fetu immaturo partus edebat acerbos
641 ante diem caeli vitio solisque maligni.
642 Quin etiam, caelo illustri, de nube serena
643 non semel auditi sudum per inane fragores,
644 sed tamen istius pars maxima cladis ad hortos
645 pertinuit, saevis pomaria perdita ventis.
646 Rex autem, attonitus monstris, vocat undique vates,
647 quid portenta velint rogat et consulta requirit
648 clade super tanta. Memorat pars multa repulsum
649 Zethen et Calaim qui sese Aquilone creatos
650 jactabant dum regales peterent hymenaeos.
651 Spem dabat ambobus mater, non ipsa negabat
652 filia, sed neuter Regi populoque placebat.
653 Quod Boreas animo forte indignatus iniquo
654 per conjuratos molitus talia fratres :
655 dum vindicta omnem tum demum expleverit iram.
656 Pars Circen causatur Atlantiademque Calypsum,
657 utramque infestam regi. Nam prima Calypso
658 se memorans indigne habitam Phaeacibus ipsis,

659 pro Laertiade accepto, quem nympha ferebat
660 esse suum, sese passuram impune negabat.
661 Verum aliis suspectum odium et vicinia Circes
662 quae poterat Lunae ipsius confundere vultum
663 carminibus purique auras corrumpere caeli.
664 At bonus Eurymedon, vates Phoebique sacerdos :
665 "Externas, inquit, cladis ne quaerite causas :
666 nos ipsi fontes sumus", et simul alta repressit
667 ora silens maestusque. Jubet rex ipse silentem
668 effari quid deinde velit, quae crimina pandat.
669 Ille autem : "Non verba sibi jam multa requirit
670 ipsa rei gravitas, quando pejora timentur,
671 et locus est votis, crimen per vota piandum est.
672 Namque graves magni exercent nos numinis irae.
673 Regia quod multi replerent horrea fructus
674 ipse suae Alcinous curae tribuebat et arti,
675 demens ! Qui divos non respiciebat agrestes,
676 nec Solem aurarum tempestatumque potentem,
677 nec ventos ipsumque Jovem placare solebat."
678 Tum sese Alcinous coepit sentire nocentem
679 incusans durumque animum fastusque superbos.
680 Itur ad Hesperidem silva in Phaeacide nympham,
681 quae responsa deum luco reddebat ab alto,
682 et vox per lucum non longe audita silentem :
683 "Ite, Jovi magno bissex mactate juvencos,
684 et totidem Soli, numen violastis utrumque :
685 proveniunt omnes utriusque a numine fructus."
686 Ibant et Soli tauros magnoque tonanti
687 mactabant, quae sacra pater facienda quotannis
688 imperat Eurymedon servanda nepotibus ipsis.
689 Interea murum pomaria plantat ad altum
690 Alcinous, contra Boream ventosque nocentes,
691 de nymphae ipsius monitu captatque reflexi
692 vim solis, si non aequos daret ille calores.
693 Hinc mos plantandi natus pro pariete rami
694 quem licet Hesperiiis aetas aboleverit oris ;
695 illum Neustriacus sero post tempore pastor
696 restituit docuitque suos quod Neustria justi
697 solis egens, per se non fructibus apta coquendis
698 esse queat, ni solis opem petat ipsa reflexi.
699 Inde Parisiacum mos is deductus in agrum
700 per totum coepit late increbrescere regnum
701 atque omnes demum se commendare per hortos.
702 Quique meos audis monitus, hac parte decorem
703 ruri quaere tuo, nec te protendere murum
704 paeniteat, viridis quem vestiat ordine longo
705 textus et assiduo insistens ne parce labori.
706 Et dum fructiferam lustras per singula pubem
707 pomososque satus et frondea texta pererras,
708 si quis luxus erit, si quae petulantia ramis,
709 falce seca lignique animos compesce protervi.
710 Utilis est horto domini manus, utilis ipsis
711 arboribus, qui si muro non haereat arbos
712 aut resoluta suo laxet se pergula versu,
713 ipse recomponit ramos et vincla renodat,
714 comptus ut egregio se proferat ordine textus.

715 Frondibus ipse etiam erucas bruchosque voraces
 716 decutit, et mensis quos destinet ipse secundis
 717 praegustat fructus carpendaque tempore certo
 718 poma notat laudatque suo dotata colore,
 719 et male formosi culpat mendacia fructus.
 720 Si sit cultus ager quid culto accedere possit,
 721 quae quibus est meritis arbor spectata, parentem
 722 quae faciat melior soboles, quae cuique saporis
 723 gratia sit, turbae primus designat agresti,
 724 pomiferas studiosus opes dum crebra revisit.
 725 Atque suam partes curam fert acer in omnes,
 726 nec requies quin aut multo se germine ramus
 727 induat aut fructu felix exuberet annus.
 728 At procul hinc absint lenti mollesque ministri :
 729 quisquis adest operi plusquam pro parte laboret.
 730 Nam plantis suus est labor impendendus et acri
 731 urgenda est studio tellus cultuque domanda.
 732 Nec te putri etiam cunctantem incendere terram
 733 saepe fimo pudeat ; putri nam fota tepore
 734 terra parit laeto plures ex ubere fetus,
 735 nec gravibus pigeat glebas invertere rastris
 736 atque novo versas interdum ostendere soli.
 737 His autem studiis si non respondeat annus
 738 vestrum crimen erit, venti ! Namque omnibus omnis
 739 est semper per se tellus obnoxia ventis
 740 et caelo paret, caeli seu forte supremi
 741 audiat imperium. Vos proinde ignoscite venti
 742 arboribus, veniet tali pro munere merces,
 743 de pomis vestro pars evitata furori
 744 solemni ritu sacras pendebit ad aras.
 745 Mille autem plantis sunt morbi, incommoda mille,
 746 mille hostes, tantis prudens defende periculis
 747 immeritas : caeli vitio venit atra maligni
 748 saepe lues primi quae spes interficit anni.
 749 Is porro arboribus caelo si morbus iniquo
 750 ingruerit gentemque lues pervaserit aegram,
 751 implorent precibus superos votisque coloni.
 752 Contra pestem illam nil praeter vota relictum est.
 753 Si morbo gravis arbor erit vel segnior annis,
 754 illam tolle loco, facilis jactura vetustae
 755 arboris : audaci pollens nitidusque juvena
 756 uberiore tibi fetu laetabitur heres,
 757 et vacuo longe melior dominabitur arvo.
 758 Tuque graves annos plantarum animosque notabis
 759 aspectu ex ipso, si cortice ligna patebunt
 760 hiscenti, si per ramos languentibus arbor
 761 pallebit foliis dum cetera turba virebit,
 762 pallenti nimiam falx sedula deputet umbram.
 763 Saepe etiam informis scabro sub cortice cancer,
 764 aut urens muscus concrevit et horrida late
 765 seu scabies truncum crudeli tabe peredit.
 766 Strenuus hanc ferro labem compesce priusquam
 767 ad vivum persidat et arboris intima carpat,
 768 ac totam macie gentem deformet iniqua.
 769 Quod si languerunt exhaustae ad munia vires
 770 absumptusque vigor, sterilem circumfode campum

771 et terram suis immundae raucaeve palumbis
772 sparge fimo terraeque fimum confunde regestae.
773 Nam sicci saturanda fimo jejunia ruris.
774 Nec mihi displiceat scrobibus qui sicca sub altis
775 aut folia, aut lentam filicem siliquasque fabales
776 injiciat, mixtasve fimo limoque myricas
777 aut cinerem immundum late agrum effundat in omnem.
778 Omnibus his non ille parum rus segne juvabit.
779 Ne tamen ipsa tibi plus ubere fertilis aequo
780 ne sit humus, nam justa aliis ut pabula desunt
781 arboribus campo e sterili, sic saepe nocebit
782 plantis pingue solum, nimii quod copia succi
783 obruat injusta molles uligine plantas.
784 Quam vero sit pinguis humus moderanda per artem
785 quo cultu sterilis, quo sollicitanda labore,
786 si nescis morem tu percontare receptum.
787 At super effusos ruptis de nubibus imbres
788 nec quae impune suas partes agit horrida grando
789 mille etiam teneris illudunt undique pestes
790 arboribus, culices, bruchi fucique sonantes,
791 quaeque solent plexis ramos involvere telis,
792 erucae et tortae spiris testaque volutae
793 reptantes cochleae meropesque aliaeque volucres,
794 quarum sunt quaedam plusquam per rostra timendae
795 arboribus, tigres ideo de nomine dictae,
796 quod contage mala silvam gens inficit omnem,
797 unde lues oritur nulli patienda colono.
798 Dede neci pestem infestam fumoque volanti,
799 frondibus et ramis diros interfice vermes.
800 Quid memorem muscas, quid pictos terga lacertos
801 et quae lucifugi fodere cubilia talpae,
802 quique cavis mures veniunt ad furta latebris ?
803 Vos istas variis, vos demum avertite pestes
804 insidiis, hanc ipse viam sibi suggeret usus.
805 Num me praeceptis jam parcere pluribus aequum est,
806 nec mihi cum rudibus res est peragenda colonis,
807 nec doceo priscos campi Laurentis agrestes.
808 Utque omnes passim pollent hac arte coloni
809 vix habet egregios aetas jam nostra quod addat
810 hortorum ad cultus. Sed non describere villas
811 insignes celebresque hortos memorare canendo
812 jam vacuum est, patrii nec dicere ruris honores,
813 quod loca et ipsa mihi ignoscent dominique locorum.
814 Posthac fors et erit si Franco opulentia ruri
815 contingat nostrisque accedat copia rebus,
816 ut blandae demum summo de munere pacis
817 telluri melior veniat fortuna colendae.
818 Nam totum nuper crudelia bella per orbem
819 vidimus et torvo Europam sub Marte frementem
820 morbosque horribilemque famem febresque malignas,
821 atque cruentatos civili sanguine campos
822 aversosque omnes superos. Quis crimina fando
823 explicet eversamque fidem temerataque jura
824 et populos regum respersos caede suorum ?
825 Damnaque nos istis etiam graviora manerent
826 ni de supremo concessus munere divum

